

四庫全書

集部

欽定四庫全書

集部

御定歷代賦彙卷七十二

詳校官檢討臣劉忻

主事銜臣徐以坤覆勘

總校官編修臣王燕緒

校對官中書臣李斯咏

謄錄監生臣沈智

欽定四庫全書

御定歷代賦彙卷七十二

宮殿

甘泉宮賦

漢
劉歆

軼陵陰之地室過陽谷之秋城迴天門而鳳舉躡黃帝
之明庭冠高山而爲居乘崑崙而爲宮按軒轅之舊處
居北辰之闕中背其工之幽都向炎帝之祝融封巒爲
之東序緣石闕之天梯桂木雜而成行芳肸蠭之依依

翡翠孔雀飛而翱翔兮鳳凰止而集栖甘醴涌於中庭
兮激清流之瀾瀾黃龍遊而蜿蟺兮神龜沈於玉泥離
宮特觀樓比相連雲起波駭星布彌山高巒峻阻臨眺
曠衍深林蒲葦涌水清泉芙蓉菡萏菱荇蘋蘩豫章雜
木梗松柞栝女貞烏勃桃李棗檍

許昌宮賦

魏
卞蘭

入南端以北眺望景福之嵯峨飛棟列以山峙長塗邈
以委蛇見欒櫨之交錯觀陽馬之承阿轉狎獵以相因

若流風之揚波木無小而不礪材靡隱而不華懿采色
而發越瑋巧飾之繁多雙轅承粉丹梁端直明牕列布
綺井崩疑其陰則有望舒涼室義和溫房隆冬御飾盛
夏重裳同一字之深邃致寒暑於陰陽修欄蔭於階砌
崇棟拂乎旻蒼綺發組華翡翠生光丹草周隅靈木成
行非窈窕之至貴孰能升於斯堂坐金人於闐闔列鐘
簴於廣庭天鹿軒翥以揚怒獅子鬱拂而負植珍果敷
華蘭芷垂榮百壁照耀飛響應聲扣角則春氣至彈商

則秋風征歷神芝之峻觀幸安昌之巍巍進鼓舞之祕
伎絕世俗而入微興七盤之遞奏觀輕捷之翩翾或遲
或速乍止乍旋似飛鳧之迅疾若翔龍之遊天趙女撫
琴楚媛清謳秦箏忼慨齊舞絕殊衆伎並奏角巧騁奇
千變萬化不可勝知樂戲闋遊觀足登承光坐華幄論
稽古反流俗退虛僞進敦樸寶賢良賤珠玉豈必世而
後仁在時主之所欲

許昌宮賦

魏
楊修

於是儀北極以構橑希形制乎太微

原本闕
六字

結雲閣之

崔嵬植神木於靈草紛翳蔚以參差爾乃置天臺於辰
角列執法於西南築舊章之兩觀綴長廊之步櫚重閨
禁之窈窕造華蓋之幽深儉則不陋奢則不盈黎民子
來不督自成於是天子乃具法服戒羣僚鐘鼓隱而雷
鳴警蹕嘈而響起晻藹低徊天行地止以入乎新宮臨
南軒而向春方負黼黻之屏風馮玉几而按圖書想往
昔之興隆

新宮賦

北齊
邢邵

擬二儀而構路寢法三山而起翼室何大厦之耽耽而
斯干之秩秩豈西京之足偉故東都之所匹爾其狀也
則瓌譎屈奇瀾漫陸離嵯峨崔嵬巉巖參差若密雲之
乍舉似鵬翼之中垂布菱花之與蓮蒂咸反植而倒施
若承露而將轉似含風而欲披土成黼黻木化蛟螭布
紅紫之融泄間朱黃之赫曦獸狂顧而猶動鳥將騫而
中疲木神水怪海若山祗千變萬化殊形異宜陰梁北

注陽烏南施百楹列倚千櫨代支或據險而形固或居
安而勢危

上陽宮賦

唐
賈登

天子卜惟洛食受於河圖開上陽之別館取大壯之規
模爾其則以三象當乎四術沓雲構而承天擎露盤而
洗日俯馳道而將半臨御溝而對出疑海上之仙家似
河邊之織室昔者嚮明南面十月遊巡旣其避暑亦以
迎春鏤章霞布環衛星陳集諸侯則朝乎萬國張廣樂

則和乎千人得橫汾於即事將燕鎬而爲鄰旣而大駕
斯去華宮不御閉玉戶而藏春掩金臺而罷曙見芳草
之空積看桂花之獨著人多望幸之誠地惜離宮之處
別有洛陽下客東魯餘風辭官北部對問南宮賦甘泉
於此日希客薦於揚雄

望春宮賦

以春望郊野順
時布和爲韻

唐

闕名

青門之左兮層宮嶙峋資睿覽以臨下得嘉名於望春
故在東以就乎陽位當出震必俟於良辰乃發惠和式

遵夫月令無勞轍跡自表於時巡其初也度弘規法大
壯標上苑而獨出儼複道而明望遠天聽以遂於羣生
浹皇情用交乎四暢鮮飈微扇籠輕靄於高臺淑氣初
臨鑠浮光於綵仗吾君於是縱目前檻馳神遠郊散晴
煙於地表拂佳氣於林梢靚青陽之煦然載懷祈穀聽
鷦鷯之鳴矣不使覆巢布政有孚宸遊是假察微明於
遠嶠睇新綠於平野南山之翠色盈前渭水之素光在
下蓋將賦藉田於晉代豈比撰吉日於周雅美矣哉蟲

雲楣以重疊煥藻井以輝潤居高而遠無不臨涵澤而
動無不順諒可裨於恭默非取樂於崇峻況乎流鶯欲
轉初柳生姿懿祥風之習習增麗日之遲遲偉鳳闕之
樓臺萬邦仰止盼龍鱗之原隰五稼惟時聖上所以成
化用彰克勤是務玄功所以遐及仁術紛其大布斯宮
寧夸後之爲斯望匪盤遊之故旣而天地叶神人和脩
文以昭士耀武以止戈然則賦望春之事宜乎播大雅
而登歌

華清宮望幸賦

以題
爲韻

唐李程

上苑之左兮驪山之中天作高岫帝爲離宮示宸遊之
有所表聖鑒於無窮臨峻路而赫其昉昉標爽塏而屹
以崇崇惜翠華之未至闐紫殿而猶空則有望幸其中
流睇延慕希天顏而回矚望雲闕而屢顧想恩波之東
注俯瞰渭流愛佳氣之西浮空瞻秦樹目盡煙末心馳
御路何聖慮之未還獨幽懷而能喻窮轍跡且俟玉山
之遊想車音將購長門之賦矧夫閣有朝元之美稱殿

有長生之嘉名霞駭丹檻雲攢繡楹可以召通仙之降
止安皇祥之永貞是以仰碧落竭丹誠庶日月之迴照
等葵藿而同傾濯鬱沸之泉每想金輿之度踐萋青之
草還思玉輦之行雖託質於別館常寄心於穆清戀戀
西向悠悠矚望步磴道以寂歷眄廣庭以寥曠竹花雖
吐如含待鳳之誠雲氣纔升若睹從龍之狀彼玉山旣
遠金闕仍賒未若浮游近縣如在仙家俄天邑之孔邇
自神都而不遐雖館稱五柞殿美九華喻之於此曾何

以加惜乎神光未矚曠此佳境徒企想以忡忡復懷慕
而耿耿閉玉樹於深谷銷金鋪於秀嶺君乎君乎胡不
出宸居而來幸

晴望長春宮賦

以登碑起
遐望爲韻

唐

梁洽

雲收野迴今目極千里空淨川長兮纖埃不起視河外
之離宮信寰中之特美飛重樓之沓秀繚長垣而層趾
詳巨制與宏模固一君而萬祀振秦晉之襟帶據山河
之表裏諒神功之所營匪靈光之能擬邈矣轆轤皮乎

峻嶒對華山之巔肩挾重關之股肱文物著明則可久
可大制度豐敞則不騫不崩來蘇之詠已作觀風之道
斯弘遠樹遥晴挂長虹而欲飲祥煙不散俟吾君之復
登宮闕多奇藥櫨疊施倚萬楹以磊砢洞千門而陸離
玲瓏玉樹則偏澄霽色連騫繡檻則却映斜曦設璇題
以曜殿黏頽壤以文陴度之以几筵則有典有則約之
以軌物則不高不卑當今取實去華匪儉匪奢搏節三
代光宅四遐豫順以遊御六龍而戾止聲明自溢奄九

有而爲家且夫書稱梓材易稱大壯自昔棟宇之作未
有茲宮之狀夫長者仁壽之宗符春者發生之所向伊
嘉名之可偉乃動植之攸尚客有學古之流乃含毫而
一望

上陽宮望幸賦

唐
謝觀

宮闕崇崇縈帶洛河之上據臨天地之中儼百司以環
拱流百川兮會同曷君王之未顧屹樓臺而鎮空或斑
白里人或前後近侍覩周公之舊制憶開元之故事當

域中之正寢實王者之定位何乃內外如一東西有異
思紫泥而日日將來仰玉輅而年年未至徒使萬室向
曙千門洞開藹臣心以西望希天睠之東迴見紅輪之
漸晚又翠華之不來及夫玉漏報更蟾輝永夜皆傾耳
以聞屬恐飛詔之潛下徒玉兔之屢虧尚金龍之未駕
是必左右獻書股肱啓謀以爲王者一德合居上游以
爲金城千里能制諸侯殊不知四海無虞五兵載戢與
殷周而抗節豈秦漢之能及在仁義而聿修奚險固之

是急且夫中岳爲內四岳爲藩此則前控伊闕右闕轅
轅乃文公立圭之地是成王定鼎之原寧勞百二之勢
足居九五之尊所以乾乾屬望戀戀何言尚軫憂人之
念未垂巡狩之恩雖年華不負於照灼而煙花暗老於
宮垣况復伊洛王畿峻函近地往復無勞人之役邇迤
有行宮之備冀我王之臨兮示天下爲家之意

乾清宮賦

明 黃佐

丕鏖維明帝睠鴻德適寧寰區烈祖受之宅離作都秉

粹精以靈承握隆禧之昌符文皇振業依黔嬴而奠辰
樞繚瀛廓穹肇此天居粵乾清之祕宮總玄黃之噴薄
何富媼之蘊靈竣定鼎而後獲洎龜謀之襲契法太紫
以營度蓋以疏明淪聰儲神習體軼煩惱而游沖漠者
也稽諸邃古合宮總期黃虞之始經營而成周路寢之
所儀九筵五雉於皇拓之旣普而深亦麗且彌匪維宴
娛日監在茲湫謬霄霓之中於以敬陟降而崇緝熙建
休號以詒燕謀蓋亦已百有餘朞矣越闕逢闕茂之歲

赤燁章怒鬱攸孔震結構塗涌氛祲徹旻豈拯人之嫁
雪將第舊而布新詔司空而倂工走羣靈而驅八神劓
石則無閤不周之喂掄材則荆揚岷峩之阻輓修綽則
山善稠叢伐輪囷則雷闕邪許驥駢駘磕淫淫與與揮
汗爲瀦焚日成暑陶埴鍛厲之屬莫不臚分其曹伍於
是乎揆日晷驗星文陳圭臬絜廣輪宗伯獻模林衡效
勤鑿聲敷岳鋪徒篲雲擾人司堅匠慶揮斤約築削屢
子來以趣役者虎躍而霆犇旣乃考工咳計以萬雕摩

維精賁輪飾奐炯然陽化爍爾陰泮奪真巧於大鈞雖
鬼神其猶憚故其爲狀也豐融曼衍揭業崢嶸縵縵莫
莫膠流交嬰邈穹隆以閎壯亘礚礚而靖冥歆歆赫以
威魄儵康崑而齎停宕蹺壯於天漢紛攢羅而混成瓌
殊俶儻不可殫形恍兮忽兮擗膠葛騰九閎接耀魄之
威神幹璇璣而緯高明羌躑躑以輶螭魂悚悚其若驚
爾乃登泰階之三重遵軌塗之盤曲鈎陳縱橫以匡衛
閣道駛駢而延屬仰而瞻之若燭龍之蜿蜒引扶光而

噴若木頰而履之若巨鼇之鼉肩運九垓而苞百谷團
殷殷般以離立珠煥黃以相燭函網緼之元氣文何有
乎黶黶彼曾城與縣圃昔傳聞而今駭矚其上則觚稜
高標金爵翹翹琉璃鱗鱗劃霓摩霄織烏顧兔出沒扶
搖屹華表以縈旬始莅颯擻乎斗杓簷牙翔而阿雷奮
絕浮景而翻碧寥其下則鈎砌瑤礎右平左城承以峻
基廣以夷石盤以蛟螭塗以朱碧鞏若崑崙鎮奠南極
削劣繒綾磴磴即即其中則縣絳房植耿耿層覆梅梁

揭宇藻井承漏構檻櫺林修栱曲枝飛栳浮柱支撐環
句題鄂衝蕤以霞張桷棟婣姁而霓糾傍天蟠以紺間
瀟沛艾以赴蟬上飢麗以互經下焮歛而騰湊玉繩倚
扼於奧窻瑤光燦朗於窗牖轉稜度閼蠖略鴻溶網戶
翠錢金鋪瑱牕五采爭勝流烟走虹壁門洞開璀璨玲
瓏流蘇縣璫招搖從風文鏡曲瓊煜煜雍雍鼉采夜光
之飾與灝氣而相通誅蕩蕩以寥豁忽眴眴而冥濛采
五城而張六幕終紛員而莫窮其外則輦路纚連繚垣

周迴複道遐阪達於平臺玄厲黃磬間以玫瑰苑苑葱
蒨垂楊大櫟永巷迤邐是爲總街乃顧二門業業將將
日精月華左右相望鬱儀望舒駐轡而驤重闌逾延開
闔陰陽試舉其名則維百福與千祥香騁驚以竚窅躋
重欄而攀天梁東望文華蒼龍守闔上憲攝提析木之
津啓搖山之碧鏤蹠勃丘之寶輪冊府中觀圖書萃珍
庖閣閒館昱爚嶙峋西望武英金虎環陞象彼背觴衡
石積脣牙璋葆旅焱動雷厲蒿室蘭唐截業迢遞掖垣

之外周廬宿衛於前則華蓋謹身通於奉天實應太一
文昌太微三光之廷帝車運衡合契軒轅鶉光溥照燁
燁在焉垂拱中宸恭默如淵於後則坤寧噦噦含貞符
矩位正玄枵星躔婺女抗虹扶棟鑿翠開籞四榮雲譎
萬拱菱杼玉妃金釭鵬騫鳳舉儷我宸極以爲內主若
乃仁壽清寧問安承顏黔干黃祇倬彼玄間彼昭德興
泰長春百花諸宇則又儲靡曼而列幽閒衝風颺乎闕
幕散或或之椒蘭紅繡績與機杼儼河鼓之天孫函芟

莢以晞日珎瑤戛乎珊珊爰設六尚以掌九室冠袍鞬
鞞其儀有似彤瑄煒煌伊違斯弼敘燕寢之條紀恒授
環而戒逸銘槃鑑以昭警司精微於密勿爾迺暖殿弘
敞青軒彤墀帳設甲乙翠被絳旒霍落簾櫳晝杳魚
循除而架有筮有籒盡頂重揅搓牙剝施方亭曲榭獸
鑰闕陟歷夫欽安仁智乃瞰百子之池游鯈灩澦汎淡
漣漪鳴鳬翔鵠頡頏栖遲植芭蕉與芙蓉靈囿莽乎萋
萋監宮鶴立以企幸賊蚪幄而矚龍旗黃衣有徒灑埽

供事儀文璽綬以及捭駟監局之號二十有四銀瑤珥
貂時維閨寺挈壺之設於彼外闈蓮燈蚪漏貯水運機
偶神按候與天弗違鵲沼鵲樓黎旭熹微鼓登柝應雞
人呼旦蟲飛而會盈燎輝而色辨天子乃駕鸞蓋銓鯨
鐘清黃道出紫宮端門載啓執法當中左掖右掖星共
雲從羽林森森而就次旄頭髦若其蒙茸自三能而建
即位莫不矢心於重瞳明庭景昃玉未遑食庶采旣臚
乃還宮而定息猶糾虔乎天刑夕惕厲乎袞職守琬琰

之彝章鋪鴻藻而立極誕茲宮之成也聖神聿興時維
綴旒信帝心之簡在用迓德而彰景休皇輿發迹乎郢
甸鳴玉鸞之啾啾歌斯干以考室非鬼神而孰謀軫民
役之勞疚仰先后之懿猷蓋奕奕款款執執如也於是
帟幕霄縣緹帷宿設雲構呀赫登降詘折龍超虎視遠
瞻近察披樾奇妙規矩相叶神移天運俞哉匠哲簣牢
籠乎宇宙挹三辰而可擷山川瑣尾而在下九野磴磴
而昭晰威靈旁魄而四塞規萬世而安洪業乃念宣廟

圖揭幽風稼穡艱難景觸心融乃念敬考調元習靜光
祚思賢永言顯聖是以服閑邪之炯戒體慎獨之微言
追往初之遐躅襲得一之自然曰出王與游衍恒對越
乎昊天昧爽兢兢而練要蓋冥心乎馮翼之先於是乎
革批政尚仁厚興禮樂韜甲冑振幽滯揚側陋咨九扈
禮三壽乃郊上玄以昭在宥聲從海流澤與霖究覆露
入於毫芒猶聞懌而敷茂慶霄挾而嘉穀穎顯臚饗之
純祐然猶嫌其休烈慈謂小康斥去奇袤以謹急荒郅

大隗而問道誦丹書而自彊攬日月以爲明摘雲漢以
辨章前蜚廉以渙號後屏翳使服箱靡握譽而爲綢旄
濛濛而駢昌光驅豐隆與列缺砰震曜乎鬼方永合德
乎泰清紘六合而爲綱諱曰灝灝奧區晷曠麗庥神
靈兮睢睢盱盱泛泛溱溱遶廣廷兮戴盆掩袂晞天障
日紛萬情兮維皇建極維聖存誠刪天經兮倬約脂韋
玄濬乘陳洞蘖萌兮沕滴曼羨錫屑隕祉伋頌聲兮時
乘六龍昭受休嘉億斯齡兮

漢宮春曉賦

有序

明 徐世溥

孝武皇帝旣感子虛上林之事元光四年春晨游後宮
意動趣駕召司馬相如爲賦相如進曰臣鄙人未覩宮
中之實所稱雲夢上林徒意爲之且夫子虛烏有又何
足爲天子道乎必不獲謝昧死請得縱觀宮中於是上
詔宦者導從相如著籍得縱觀宮中三日旣罷賜洗沐
一月賦奏天子稱善傳示宮中贈遺累萬以相如爲郎
其詞曰

夫何春暉之窈窕兮澹裔裔乎依人被陵原以殊姿兮
草木寤而懷新迢迢遙以入宮兮歷阿閣而詎尋颺遠
近其同芳兮善翩翹以窺襟搖壁璫之參差兮羌孰辨
其笙琴闐彼燕趙之嫋麗兮徂四序於閒深維風雨之
增歎兮旣頽思於柔裯曰明月其猶可愬兮竊獨悲樂
夫旭日之初臨始昭藐以睨牖兮若含笑而流波繼躑
躑以少進兮逞嬉顏而逾和遂偃蹇而狎人兮鑒旖旎
之垂羅射網戶以返照兮璐階蘋而生霞灼未央之崔

嵬兮馭娑騎虹以駕梁鬱杙詣與發越兮疎屏帨而虛
翔躋披香以經蒞若兮金鋪赭何煌煌煜千門之寶甃
兮青燐下上而連光曄先晞西盤之灑露兮遂左陰而
右陽於是鵲雞罷舞交鶯變聲鐸傳長信鐘殷承明周
廬競闢訇若雷霆錦衾回夢綺幄齊驚慘餘溫而戀枕
兮欣初照而俄興怡怡悵淑態無方娟然揚睇光在
屋梁苑香入幕蔓影侵牕潛理私束盥飾明妝脩鬟髻
摘領裳端鼓宜否纖悉審詳亦有宿倦未解獨弛珠簾

薄裝舊襦幽靚自然褻紈匪澣媚鬢從偏就庫闔以仍
憩兮拭曼睫而猶矐紛敏緩之異性隨矜懈以殊妍爾
迺颺霧縠鳴璆珮拂琳瑯步容裔違洞房踐瑤砌乍相
見吐蘭蕙詢宵夢之若何兮論新飾之同異則有先秋
擣素乘旦漱裳懸練擬瀑搓帛疑霜或篝絡於鍼縷眇
凝睇以秋思摘經夕之條蕊相栖肅之所宜誰與奕者
遠識棋聲纖手稱敵並坐皇英云誰穉笑擷草羣嬉角
多行罰祕異爲私乃有連袂出游三五爲曹或俯鏤檻

或眺靈霄攝裾防胃揄袖迎飄故匿叢兮諠侶乍隔葉
兮相招同有望而期造惜綦履以擇蹊遵微行而容與
漾深竹之流颺忽焉莞爾倩頰橫春折柔豔翳華簪鏡
清流憺宜人乃賦香秔有鳬鴛鴦振鷺暴羽孔雀賓暘
馴禽就食颺沓成行忘調饑之仞仞兮綽解泰以相羊
當日之班擲洮之餘蕭趨長樂溫室渠渠雕檐開曙煥
若神居白髮嚴藹姪娥侍梳帳盤桓列諸殿端闈盡開
昭陽特掩見庭燎之遺燼知和鑒之流宴惕愴恍以自

憐哀芳煙之未散若乃絃桐旣憚剗管繁興新謠競奏
關關嚶嚶淒若離鴻兮應霜汀雖若鳳戲兮雲中鳴肅
若微風灌木挾蛩吟諧若雨潤潺湲雜松聲聞之者莫
不洸養溶潏渺渺怛怛故能使曉日爲之緩午而浮雲
不生也或能徭以巧笑或僊僊而姍舉或莊凝以正色
或惜嫵而恬嫵莫不音度旋日停波之曲影貯桂棟杏
梁之宇細腰膩理鉛妝萬千離宮別館三十六所強爲
樂之多方兮諒難得而備數也亂曰盛年深宮掩寂寞

兮晚晚桑榆去人遠兮春回鮮榮如夢覺兮萬戶箏謳
樂莫樂兮一人承恩兮羣翠輦光潋灩兮愁人心宮闕
崢嶸兮日下遲烏負影兮昭陽飛揚裊烟兮蠶吐絲宮
中春兮春不知

明堂賦

有序

唐
李白

昔在天皇告成岱宗改元乾封經始明堂年紀總章時
締構之未輯痛威靈之遐邁天后繼作中宗成之因兆
人之子來崇萬祀之丕業蓋天皇先天中宗奉天累聖

纂就鴻勳克宣臣白美頌恭惟述焉其辭曰

伊皇唐之革天創元也我高祖乃仗大順赫然電發以
首之於是橫八荒漂九陽埽畔換開混茫景星曜而太
階平虹蜺滅而日月張欽若太宗繼明重光廓區宇以
立極綴蒼昊之頽綱淳風沕穆鴻恩滂洋武義烜赫於
有截仁聲馭胥乎無疆若乃高宗紹興拓統錫羨神休
旁臻瑞物咸薦元符剖兮地珍見旣應天以順人遂登
封而降禪將欲考有洛崇明堂惟厥功之未輯兮乘白

雲於帝鄉天后勤勞輔政今中宗以欽明克昌尊先軌
以繼作今揚烈聖之耿光則使軒轅草圖羲和練日經
之營之不采不質因子來於四方豈殫稅於萬室乃準
水臬攢雲梁罄玉石於隴坂空環材於瀟湘巧奪神鬼
高窮昊蒼聽天語之察察擬帝居之將將雖暫勞而永
固今貽聖謨於我皇觀夫明堂之宏壯也則突兀曠曠
乍明乍蒙象太古元氣之結空籠崑頊沓若鬼若業似
天閭地門之開闔爾乃劃岑嶺以嶽立郁穹崇而鴻紛

冠百王而垂勳燭萬象而騰文寥惚恍以洞豁呼嵌巖
而旁分又比夫崑山之天柱矗九霄而垂雲於是結構
乎黃道宮堯乎紫微絡勾陳以繚垣闕閭闔而啓扉崢
嶸嶒嶸粲宇宙之光輝崔嵬赫奕張天地之神威夫具
背泓黃河琅湫清洛太行卻立通谷前廓遠則標熊耳
以作揭豁龍門以開關點翠彩於鴻荒洞清陰乎羣山
及乎煙雲卷舒忽出乍沒岌嵩噴伊倚日薄月雷霆之
所鼓蕩星斗之所任仡挈金龍之蟠蛻挂天珠之硤砢

勢拔五嶽形張四維軋地軸以盤根摩天倪而創規樓
臺嵬岊以奔附城闕嶽崱而蔽虧珍樹翠草含華揚旌
目瑤井之熒熒拖玉繩之離離擢華蓋以儼濟仰太微
之參差擁以禁局橫以武庫獻房心以開鑿瞻少陽而
舉措採殷制酌夏步雜以代室重屋之名括以辰次火
木之數壯不及奢麗不及素層簷屹其霞矯廣廈鬱以
雲布掩日道遏風路陽烏轉景而翻飛大鵬橫霄以側
度近則萬木森下千宮對出媚乎碧光之堂炁乎瓊華

之室錦爛霞駸星錯波沕颯蕭寥以颺颺宵陰鬱以繇
密含佳氣之青葱吐祥煙之鬱律九室窈窕五闔聯繇
飛楹磊砢走拱寅緣雲楮立岌以橫綺彩掬攢藥而仰
天皓壁晝朗朱甍晴鮮頰欄各落偃蹇霄漢翠楹迴合
蟬聯汗漫沓蒼穹之絕垠跨皇居之太半遠而望之赫
煌煌以輝輝忽天旋而雲昏迫而察之粲炳煥以照爛
倏山訛而晷換誇蓬壺之海樓吞岱宗之日觀猛虎失
道潛蚪蟠梯徑通天而直上俯長河而下低玉女攀星

於網戶金娥納月於璇題藻井彩錯以舒蓮天牕葩翼而衝霓扶標川而罔足擬跟挂而罷躋要離欽矐而外喪精視冰背而中迷亘以複道通乎掖垣奎入西樓實爲崑崙三事庶尹正儀躅以出入九夷五狄順方面而來奔其左右也則丹陛粲粲彤庭煌煌列寶鼎歆金光流辟雍之滔滔象環海之湯湯闢青陽而啓總章廓明臺而布玄堂儼以太廟處乎中央發號施令采時順方其閭闔也三十六戶七十二牖度筵列位南七西九白

虎列序而躩踞青龍承隅而蚘蟊其深沈奧密也則赤
燁掌火招拒司金靈威制陽汁光摧陰坤斗主土據乎
其心若乃熠燿五色張皇萬殊人物禽獸奇形異模勢
若飛動瞪盼睚眦明君暗主忠臣烈夫威政興滅表賢
示愚於是王正孟月朝陽登曦天子乃拖蒼玉轡蒼螭
臨乎青陽左个方御瑤瑟而彈鳴絲展乎國容輝乎皇
儀傍瞻神臺順觀雲之軌俯對清廟崇配天之規欽若
盥饗維清緝熙崇牙樹羽熒煌歲蕤納五服之貢受萬

邦之籍張龍旗與虹旌攢金戟與玉戚延五更進百辟
奉圭瓚獻琛帛顙昂俯僂儼容疊跡乃潔苴醢修粢盛
奠三犧薦五牲享於神靈太祝正辭庶官精誠鼓大武
之隱櫜張鈞天之鏗匄孤竹台奏空桑和鳴盡六變齊
九成羣神來兮降明庭蓋聖主之所以孝治天下而享
祀宵冥也然後臨辟雍宴羣后陰陽爲庖造化爲宰餐
元氣酌太和千里鼓舞百寮賡歌於斯之時雲油雨霈
恩鴻溶兮澤汪濊四海歸兮八荒會喤喤乎區寓駢闐

乎闕外羣臣醉德揖讓而退而聖主猶夕惕若厲懼人
未安乃目極於天耳下於泉飛聰馳明無遠不察考鬼
神之奧推陰陽之荒下明詔班舊章振窮乏散教倉毀
玉沈珠卑宮頽牆使山澤無間往來相望帝躬乎天田
后親於郊桑棄末兮反本人和兮時康建翠華兮萋萋
鳴玉鑾之鈇鈇遊於昇平之圃憩乎穆清之堂天欣欣
兮瑞穰穰巡陵於鵷首之野講武於驪山之傍封岱宗
而祀后土兮掩栗陸而包陶唐遂邀崆峒之道禮汾水

之陽渴飲沆瀣之精英黜滋味之馨香貴理國其若夢
遊華胥之故鄉於是元元澹然不知所在若羣雲從龍
衆水奔海此真所謂我大君登明堂之政化也豈比夫
秦趙吳楚爭高競奢結阿房與叢臺建姑蘇及章華非
享祀與嚴配徒掩月而凌霞由此觀之不足稱也況瑤
臺之巨麗復安可以語哉敢揚國美遂作辭曰穹崇明
堂倚天開兮龍從鴻濛構瓌材兮偃蹇塊泝邈崔嵬兮
周流辟雍岌靈臺兮赫奕日星噴風雷宗祀肸蠭王化

恢鎮八極兮通九垓四門啓兮萬國來考休徵兮進賢
才儼皇居而作固窮千祀兮悠哉

明堂賦

唐
劉允濟

大哉乾象紫微疏上帝之宮邈矣坤輿丹闕披聖人之
宇聿觀文而聽政宜配天而宗祖體神化以成規應靈
圖而立矩度七筵以垂憲分四室而通輔合宮之典鬱
乎軒丘重屋之儀崇於夏禹因殷成於五帝繼周道於
千古統正朔之相循起皇王之踵武大禮興而三靈洽

至道融而萬物覩其在國乎惟聖踐極配永登樞浹生
成於大治銷品彙於洪鑪貫星象而調七政列山川而
宅五都開洛陽之寶籍受河闕之禎圖總夔龍於國序
集鵷鷺於天衢包壯葉於玄頊籠景化於黃虞功旣成
矣道旣貞矣荅后土之嘉祥藹上雲之殊祉望仙閣之
秀出瞻月觀之宏峙鏤紅玉以圖芳蕭龜壇而薦祀道
不言而有洽物無爲而自致嚮明南面高居北辰屬天
下之同軌率海內以嚴裡想雲臺以應物考明堂以臨

人協和萬寓懷柔百神降虔心啓靈術采舊典詢故實
表至德於吹萬起宏規於太一欣作之於有範佇成之
於不日工旅奔競人皆樂康訪子興於前跡揆公玉之
遺芳順春秋之左右法天地之圓方成八風而統刑德
觀四序而候炎涼跨東西而作甸掩二七以疏疆下臨
星雨傍控煙霜翔鸛墜於層極宛虹拖於遊梁崑山之
玉樓偃蹇曾何髣髴滄海之銀宮煥爛安足翔翔於日
覽時則徵月令觀百王綏萬姓肆類之典攸集郊禋之

禮爰盛衣冠肅於虔誠禮樂崇於景令三陽再啓百昭
來朝玄纁霧集旌旆雲搖湛恩畢被元氣斯調羅九室

之玉帛舞六代之咸韶澤被翔泳慶溢煙霄穆穆焉煌
煌焉粵自開闢未有若斯之壯觀者矣煥乎王道昭賁
三才遠乎聖懷周流九垓鴻名齊於太昊茂實光乎帝
魁決羣山於雨露通庶品於風雷盛矣美矣皇哉唐哉

明堂賦

唐
任華

粵若稽古巨唐千靈累聖二葉重光思文烈以宗祀象

天地之圓方考遺訓建明堂俯南端之赫赫救北極之
鏘鏘盤螭黝糾捧神珠而高翥遊鵬翕習仰層檻以迴
翔星辰出納於䟽牖虹蜺縈帶於軒廊遠而望之若扶
桑吐日生高岡近而察之若叢雲轉蓋陵昊蒼屹崢嶸
以岑立漫離披而翼張其奧祕也懿渾退槩靈仙髣髴
肅枚枚以實實宵眇清爽日月來往赫眈眈以煌煌潛
陸嶙峋而分據樂攄磊落以相望實造化之難測非翰
墨之所詳吾君正冠冕垂衣裳佩玉璽腰千將猛簾列

崇牙張百揆時序萬國來王敦行尚年旣在南而近夏
貴仁親族乃居東而曰陽中主尊於太室西導德於總
章務兢兢之孝理匪晏晏之樂康然後知嚮明之位正
隨時之教盛因方備色乘五運以順行選士養賢崇四
學而敷令豈直若斯而已哉其宮十二以象辰行水四
周而爲海堂筵楮徑可以見乾坤之籌策暑往寒來可
以知六九之變改室也州之數牕也卦之在高得黃鍾
之實柱懸列星之彩畢千古之能事終一人之不宰至

有虞之總章期夏后之太室殷重屋以五周太廟以七
伊數君之餘制各殊塗而並逸雖信美於當年是無取
於今日別有清河絆鳥長沙求贄討論公玉之圖錯綜
伯喈之議儻繡栢之有漸庶青雲之可致

明堂賦

唐
王 諲

大唐混合寰宇開張時雍體黃中之一德居紫微之九重
既而成化再造天下有道得彩鳳之靈圖據飛龍之大
寶美其厯數會昌累葉重光真宰無爲盛先天之景

業聖人有作立配帝之明堂寫神規之大造嶷崇丘之
正陽燐燐爛爛熒熒煌煌徒觀其藻畫周設雕刻具美
綺寮豁達以生風重檐周流以藏晷欽崱嶸狀崑岳
含霧而插天衢隆崇碑砢若蓬萊駕鼇而涌海水屹乎
氤氲孤標紫氛璇題皓飾金鋪洞文拱星辰以端居傍
眺白日馮軒檻以直視俯見青雲爾乃環曲折構重屋
蓮銜綺井豔窰叱以垂珠階接彤庭影連延而造玉若
夫靈姿衆出詭變叢生畫拱攢施龍桷參崖以星布陰

室晝朗粉祀皎曜以月明及夫四海波晏一人有慶寒
風初盡陽月既正蠻夷颯沓以來王文物歲粢以交映
信所謂不宰而合通居中而作聖

明堂賦

唐
于 沼

天子朝諸侯於明堂惟古之制始以講信修睦終以布
憲施惠合至德之休光旌中國之巨麗下之象地也以
列五位之神上之法天也以配五方之帝稟太一之威
靈順陰陽之開閉左个右个分以寒暑之宜以筵以几

度以堂室之際觀乎萬國來朝威儀濟濟聖乃負斧扆而南向以布政百僚端冕弁而北面以陳禮是知人以君爲心君以人爲體宴會之節以明於尊卑慶賜之儀以旌於孝悌原夫宅中而起繼天而作遙眎嵩少俯枕伊洛巍巍煌煌厥高不可乎彌度拏龍櫟以蚴蟉亘虹梁而各落絳以綺藻施以丹雘四閤以四氣而開八牕以八風斯廓祥風布影對寶檻以交輝皎日懸光曜金牀而璀璨於是陳三獻之禮臻九成之樂申儀於辟雍

崇業於太學甄古今之至理議沿襲之踳駁旣而順斗
極運天關皇恩普矣貴賤以頒東門之外以朝乎九國
南門之下將享於八蠻正德是弘惠風斯布禁淫慝節
制度重三台之任乃申命於中階寵五霸之功遂授鉞
於東戶夫明堂者明帝之德體天爲狀必資闡化以準
程豈獨弘規而取壯出庶物而咸仰包宇宙而爲量惟
先聖之是則信百代之可尚

明堂賦

宋

范仲淹

臣聞明堂者天子布政之宮也在國之陽於己之方廣大乎天地之象高明乎日月之章崇百王之大觀揭三宮之中央昭壯麗於神州宣英茂於皇猷頒金玉之宏度集人神之丕休故可祀先王以配上帝坐天子而朝諸侯者也粵自蒼牙開極黃靈耀德巢穴以革棟宇以植徹太古之弊明大壯之則風雨攸止宮室斯美將崇高乎富貴之位統和乎天人之理乃聖大造明堂肇起明以清其居堂以高而視壁廓焉而四達殿歸焉而中

時禮以潔而儉必表之以茅教以清而流故環之以水
暨二帝之述焉合五府而祭矣逮夫夏禮秩秩奉以世
室商祀穆穆制以重屋神禹卑宮階以一尺之崇成湯
受命革以三尺之盛赫赫周堂制度景彰七筵兮南北
之廣九筵兮西東之長堂并包於五室室辨正於五方
面明堂而背北室左青陽而右總章耽然太室嚴乎中
黃都徽名之在南取盛德之向陽或謂厥堂惟一厥室
惟九闕闔其三十六戶疏達兮七十二牖亦規上而天

覆復矩下而坤厚近郊之宮廣而能受通天之宇高而弗偶八方象其幅幘九陞參其前後肅肅焉聽政之廟應辰而周彭越趙焉承天之柱列宿而相望環林兮葱蔥圓海兮泱泱旣方舟而經梁復素飾其迴牆陳位序以有嚴議法象而必臧示邦域之景鑠期人神之樂康左有辟雍天子學宮墳籍浩以明備文物森其會同奉三壽以勛天下之孝設三乏以勸諸侯之風右有靈臺庶民子來若經始於神明迺占候於昭回天之道也惟

默默以有象聖之心也蓋惕惕而無災此三雍之大者
故百世以欽哉若夫約周之禮稟夏之正天子升清陽
之位體大德之生彼相協謀有司奉行慶賜必均歷象
必明布農事於準直習舞德於和平止伯益之伐木禁
蚩尤之稱兵惟倉廩兮賑天之窮惟幣帛兮禮邦之英
無隱不彰無潛不亨蒙蕩蕩之至仁浸灝灝之醇精此
明堂之春也萬物爲之榮又若炎以繼天曦以永日始
於仲呂之管復於清宮之律天子乃登諸明堂暨夫太

室命盛樂以象德致大雩以祈實升高明而有豫定心
氣而無逸靜百官之事驅五穀之疾無索於關無難於
門止北伐之威以助養於生生導南風之和以飾喜於
元元此明堂之夏也萬物爲之繁爾乃象正火位德王
金行鴻漸于以南嚮穀萬斯而西成天子乃居總章之
輿奏清商之聲圖有功而專任詰不義而徂征修法制
以謹收藏之令養衰老以惻搖落之情同我度量平予
權衡人社以崇厚兆民報本之志神倉以祕示萬邦致

孝之誠此明堂之秋也天下爲之清及夫蟲介時分虎
威夕永詩人發其涼之詠日官賓可愛之景天子乃北
堂以居南面而省錫飲烝之慶從祀寒之請於是戒門
閤備邊境勞三農於休息警百辟於恭靖關市必易宮
室必整無用之器斯徹無事之官必省飭國典以俟來
歲之宜講武經以肅萬邦之屏此明堂之冬也天下爲
之靜斯乃順其時與物咸宜適其變使民不倦者也稽
夫宗祀之文大享之辰上儀乎皇皇盛節兮彬彬比於

郊也我則取文之勝方其廟也我則取質之純損益其
禮尊嚴其親五天之座曄曄以陳五帝之席奕奕而倫
惟太室之位迺上帝之神作配者先王從祀者五臣搏
斝離離玉幣莘莘牲牢之舉既遵於夏后蔬果之薦復
本於周人禮無不當誠無不臻聖人於是出齋宮而肅
肅被法服而循循酌一獻以從質躬百拜以表寅司儀
實相樂正攸賓進俎豆之吉蠲羅篚簋之輪囷六樂咸
在統美乎列星八風相盪同和乎大鈞下舞上歌蹈德

詠仁非常之祭駿奔者萬國莫大之孝蟻懷者兆民於是神醉其德人樂而極太史書於策大夫頌於國頌曰明堂崇之明王祀之禮以成之樂以歌之光天之下教以化之若夫元朔會同羣后對越穆穆乎舜門之闕晰晰乎宣燎之發帝時待旦而久求衣以先紆黃組冠通天建日月服乾坤佩干將升崑崙進山岳之圭當雲龍之軒正聖人之大寶示天下之有尊巍巍焉負扆而立濟濟焉辨色而入太常正其等衰九賓序其名級中階

之前三公屹然應門之外九采察焉阼階之東諸侯以同西階之西諸伯以齊門東北面者子之位門西東上者男之次東門之外則有樂浪蟠木九夷之國西面而北上西門之外則有蒙汜大秦六戎之屬南上而東向南門之外則有朱垠越裳八蠻之族唯北是望北門之外則有葷粥幽陵五狄之種唯東是尚於是旣旣旅進鏘鏘肆覲嚮明者蓋取諸離觀光者受之以晉君臣之位定禮樂之道振雅韶以奏文鐸以徇皆望雲而就日

必歌堯而頌舜上和而下樂金聲而玉潤況夫晨光赫
曦天顏弗違冕紱兮霞集玉帛兮川歸盛乎主庭之聲
明煥乎天象之光輝若北辰之會衆星咸粲粲而在共
如太陽之臨多露普湛湛而將晞莫不君三揖於上臣
載拜於下行典禮揚風雅訪雋良議窮寡人曷幽而覆
盆賢曷惻而遺野於以盛名器於以休宗社署聖法於
圓闕馳神教於方夏皇哉耀今昔之榮觀至哉敷億兆
之純嘏故曰揖讓而治天下者明堂之謂也惜乎三代

以還智者閒閒諸儒靡協議者喋喋而皆膠其增損忘
禮樂之大本泥於廣狹廢皇王之大業使朝廷茫然有
逾遠之歎惘然有中輟之議殊不知五帝非沿樂而興
三王豈襲禮而治爲明堂之道不必尚其奧行明堂之
義不必盡其制適道者與權忘象者得意大樂同天地
之和豈匏竹而已矣大禮同天地之節豈豆籩之云爾
自漢魏之下暨隋唐之際堂或三五之上道非三五之
世蓋不取其厚而取其薄不得其大而得其細享配之

文或然未分政教之烈斯焉弗聞是則帝道不施胡取
乎總期皇德不隆胡取乎合宮故夫明堂之設也天子
居之日敬日思思之何也萬微存乎消息敬之何也兆
靈繫之安危繇是惟克念以作聖思堯舜之齊名懼魏
巍之弗逮迺孜孜於雞鳴唯至平之休代思阜財於吾
民懼四維之有艱尚瘡痍而百辛故聖人之實儉弗下
剝而上侈思寡費而薄索民庶幾於格恥惟下武之太
寧亦省躬於干戈取諸豫於四方慨風雲以長歌惟知

人其古難思濟濟乎賢者蓋舉一於臯陶迺連茹於天下惟好生之至德思與物而爲春懼幽陋之靡及常咨命於仁人惟及人之一德始若晦而彌彰故三五之君子騰茂質而無疆惟皇極之大範思天下而與平懼萬物之或差時我心於誠衡然後見天下齊於無體和於無聲麗眷而壽吾何仁之有含哺而嬉吾何力之爲但淵淵緜緜無反無偏浸淳澤以成若樂鴻化於自然此明堂之道也蓋無德而稱焉我國家凝粹百靈薦馨三

極東升煙於岱首西展琮於汾側未正天神之府以讓
皇人之德祖考來格俟配天之儀諸侯入朝思助祭之
職豈上聖之謙而愚臣之惑也臣請考列辟之明術塞
處士之橫議約其制復其位儉不爲其陋奢不爲其肆
斟酌乎三王擬議乎簡易展宗祀之禮正朝會之義廣
明堂之妙道極真人之能事以至聖子神孫億千萬期
登於斯念於斯受天之禧與天下宜而已乎

明堂賦

元 祝 蕃

有大人先生問予以明堂之制者予趨而進拱而對曰
厥維明堂王者之宮爰自黃帝合宮肇名堯曰衢室舜
曰總章世室重屋建於夏商逮夫成周厥制乃備分室
疏牖列筵度位於以朝諸侯於以享上帝於以宣皇風
於以順四氣雖帝王之文質不同而名數之損益各異
然要其終則皆天子布政之宮而非辟王遊逸之地也
爾其厥初經畫之始命其工以鳩材詔哲匠使運智爰
度國陽審曲面勢倣紫宮之陰陽值心宿之所麗上圓

象天下方法地洞四方以疎門則三台以列陞其戶則
三十有六其牖則七十有二若夫東西南北之修廣則
七筵九筵之異制采緣不琢所以昭其儉丹雘不御所
以戒其侈方其朱鳥中見仲春是殷羣蟄咸啓勾萌方
新天子乃御於青陽統和天人發號施令布政行仁流
資始之大化與萬物而爲春若其孟季之月則有左右
宮之分陳及乎大火既中仲夏斯正南薰所被品物咸
盛天子乃御於明堂以布夏政興阜民之歌發解慍之

詠慮陰陽之始爭乃齊慎以怡性亦互開其左右以分
處乎季孟至若虛正秋仲天高日清萬彙斯遂稽事乃
登天子乃御於總章以秩西成或巡狩以省斂或詳讞
以修刑嘉民氣之既夷相與慶乎升平乃闢明堂之右
爲其左以爲孟月之室啓玄堂之左爲其右以爲季月
之廷及乎日短星昴殷於仲冬民事咸畢歲功告終天
子乃御於玄堂允釐百工計來歲之國用會收藏之富
豐喜一陽之來復運元氣於無窮若其孟季之月亦分

處乎左右之宮惟土王於戊巳斯中處於太室閨弗備
乎中氣乃出居於門中斯則明堂之制之見乎月令者
如此而周公朝會之制則有異而有同也厥後漢武事
務夸大濟南獻圖寔公玉帶甘泉明廷語旣傳會崑崙
道上事益神怪至於洛陽寔爲東京建武之所創始永
平之所經營制度並密頌聲乃興暨靈臺以辟雍曰三
雍而並稱雖未足比隆於三代亦庶幾乎不媿於斯堂
之名若夫李唐之肆侈飾乾元而屢更宜天心之弗享

昇烈士之火城方今聖天子襲世德承天休萬國獻圖
籍四海酣歌謳靈臺嚴太史之測候辟雍藹多士之藏
修獨明堂之未建豈王度之靡周蓋禮樂興於積德正
有待於皇上之黼黻皇猷也於是大人先生喜而歌曰
於赫皇元車書同兮文治聿興千一之逢兮厥惟明堂
王者之宮兮制作有待在皇上之躬兮適觀厥成吾與
子歌三雍兮

明堂賦

有序

元
邵憲祖

明堂之設也自黃帝至於三代雖制異名殊皆所以崇祭祀朝諸侯養老授朔也降自後世諸儒誦講此是彼非竟不終作惟漢武帝唐武后有所崇創而窮奢極侈夸耀一時先王之事無聞焉故設爲荅問極衆人之所炫耀折之以孔孟之辭其辭曰

涉無公與佚處先生遊於廣漠之野憩於無懷赫胥之庭涉無公曰子衣逢掖之衣冠章甫之冠言稱堯舜行式孔顏陶寫古今塗黃點丹然而一物不知儒者所恥

百王繩繩代殊事異崇以明堂殷以大禮緣飾乎文章
嘉美乎祥瑞奕奕皇皇天人禘祀子聞其制而知其說
乎先生曰未也涉無公曰三代以前遐哉邈乎其文不
可得而徵也吾將語子以漢唐之制詡子以宏麗之規
恢子之心胷發子之志意子樂聞乎先生曰唯唯夫漢
唐之興也虎視關右龍位洛京序九族之敦睦致萬國
之攸寧煥文物之昭回將隆底乎太平卜明堂於少陽
環紫宮而作京嚮文明而已遠濫湫於郊垧豐宏模

而大起規億載而莫傾瞻彼邃宇磊間晶瑩崔嵬山立
熠燿日升吁可畏也崑崙崛起而通天辟雍沆漑而繁
寬門延九階堂中五室玉葉戟戣而負青蜃蛤煨燭而
塗哲斐文漂渺於八方晨光炯晃於四壁飛欄軒翥以
承霄疏柱汨越而鎮極雉角矯舉崇墉繚繙階級周廻
而等凡聖殿堂嵌巖而挹蒼壁燐灼五色赫燁炳燭方
徘徊於五間儼煌煌而崇秩濔濔汧汧岌岌堂堂蚺蜺
馴豢乎蚪龍崑崙施靡乎巒岡忽蔽虧而腰眇茲靈霽

而采彰夾牕玲瓏而助明複道嬈娟而韜光重屋四阿
高臺兩旁爚爚電繞翬翬翼張拔靈觀乎其中示天下
以不藏若乃巨扁紛題異制繁詭三三相重六九相比
青陽總章洞達融泄玄堂太室幽隱鼎負勢合形離高
褰遠覲仍層厓而增盤窻通巷而纚纚四魚玄閭戶外
不閉閤焜耀而熒熒綴赤白而星麗應三統齊節氣別
九州法天紀修短各宜小大殊製柱植挺卓欄檻周廻
級棋擲比重幹指亥飛抑鳥踊大栢貫鉞方衡勒分陽

馬承隈天梁偃蹇而虹舉芝栢縋獵而雲堆枌橧紛糾
以承楹建瓴縷布而宗甑萬象灰冷通天傑出立木如
林增構如蜜珠龍斜礙於魁魑戶牖吞吐乎日月庭筵
廣均房戶齊一視聽罔屈出入忘術乃靈示之所鑒臨
人神之所昭集也天子乃命法駕乘鸞輅拖蒼蚪扶白
虎昭袞冕諧律呂聿來明堂之宇爰祀五帝配享祖宗
澄心清魂齋莊肅雍維牛維羊鬯溝醢醑飯鉶既潔粢
盛以六一獻授俎五官進熟神之格思續紛其來撫璿

璣而下視降王軌之神威帥雲陽開而陰閉翕赫精儲
而思垂介景福於帝躬錫嘉穀於蒸黎騰清霄於習霍
闕乎莫知其所之爾迺進鳩玉於更老析圭爵於侯辟
招延儒雅詢求忠直容與乎義塗安居乎仁宅然後發
德號於庶邦播惠澤於四海歷列辟而論功次羣臣而
課最蠻夷蹙角而來庭鼎然興道而自艾開六合之元
亨躋九有於熙泰遂致天階平秩坤維奠位三靈流應
二氣蠲癘麒麟遊其圃神爵來其樹醴泉發其滋甘露

零其砌諸福之物莫不畢至於是乎鴻生鉅儒鋪張揚
厲吐氣成文矢詞激句賦頌振聲歌謠接喙赫赫孔陽
昭昭靡替凡此盛事照曜青史皇元龍興君明臣良子
何不搜閱典故模寫漢唐溜珠綴辭摘藻連章獻策朝
廷之上庶興大禮而振皇綱佚處先生听然笑曰僕鄙
人也游心道義不諧衆儒考索墳典研精詩書方陋漢
唐之阨僻而子爲我言之乎且子不務古學徒訟繁儀
奢言侈靡昧籌是非訐高言以駭俗雖紛紛其奚爲惟

明堂之穆穆爰肇興於太古黃帝合宮之號虞舜總章之目夏崇世室商奕重屋揭明堂於周邦昭文物之郁郁雖有一殿五宮之列九筵七筵之異複道重屋之殊八尺三尺之紀然而享上帝以崇禮朝諸侯以定儀養三老以敦孝頌月令以順時同仁政之所出光聖世之丕基是以尼父之歎魯圖冠冕而迭居者數姓桀日之惡堯天之聖成王幼沖周公輔政棟宇非殊有德則隆興無德則不競是以孟軻居齊宣王興問則答之以王

者之堂教之以行王者之政是以文質不必計析其制度今古不必符契於典章大禮豈徒玉帛之陳設大樂豈徒鐘鼓之鏗鏘要必施仁政於海宇襲芳躅於帝王奚用間間喋喋議論紛攘徒膠泥於增損孰得而究其短長方今盛明綱紀具舉仁侔三王德邁五帝濟濟廊廟出納獻替皇風被於四海禮樂光乎后裔今子乃欲後漢唐之爲陳之帝王之世使後世好名之人殫財竭力以禍天下必子之言夫涉無公避席改容怵忽蹴踏

謹受明教服之無斃



御定歷代賦彙卷七十二

欽定四庫全書

集部

御定歷代賦彙卷七十三

詳校官檢討臣劉 圻

主事銜臣徐以坤覆勘

總校官編修臣王燕緒

校對官中書臣李斯咏

謄錄監生臣沈 智

欽定四庫全書

御定歷代賦彙卷七十三

宮殿

德陽殿賦

漢李尤

開三階而參會錯金銀於兩楹入青陽而窺總章歷戶
牖之所經連壁組之潤漫雜蚪文之蜿蜒爾迺周閣迴
匝峻樓臨門朱閣巖巖嵯峨聚雲青瑣禁門廊廡翼翼
華蟲詭異密米珍縟達蘭林以西通中方池而特立果

竹鬱茂以蓂蓂鴻鴈沛裔而來集德陽之北斯曰濯龍
葡萄安石蔓延蒙龍橘柚含桃甘果成叢文槐曜水光
映煌煌

魯靈光殿賦

有序

漢王延壽

魯靈光殿者蓋景帝程姬之子恭王餘之所立也初恭
王始都下國好治宮室遂因魯僖基兆而營焉遭漢中
微盜賊奔突自西京未央建章之殿皆見隳壞而靈光
巋然獨存意者豈非神明依憑支持以保漢室者也然

其規矩制度上應星宿亦所以永安也予客自南鄙觀
藝於魯覩斯而貽曰嗟乎詩人之興感物而作故奚斯
頌僖歌其路寢而功績存乎辭德音昭乎聲物以賦顯
事以頌宣匪賦匪頌將何述焉遂作賦曰

粵若稽古帝漢祖宗濬哲欽明殷五代之純熙紹伊唐
之炎精荷天衢以元亨廓宇宙而作京數皇極以創業
協神道而太寧於是百姓昭明九族敦序乃命孝孫俾
侯於魯錫介珪以作瑞宅附庸而開宇乃立靈光之祕

殿配紫微而為輔承明堂於少陽昭列顯於奎之分野
瞻彼靈光之為狀也則嵯峨嶭嶭巍嶷岵岵可畏乎
其駭人也宕堯倜儻豐麗博敞洞轆轤兮其無垠也邈
希世而特出羌瓌譎而鴻紛屹山峙以紆鬱隆崛岉乎
青雲鬱坱圠以增崑崙繒綾而龍鱗汨磴磴以璀璨赫
燁燁而燭坤狀若積石之鏘鏘又似乎帝室之威神崇
墉岡連以嶺屬朱闕巖巖而雙立高門擬於閭闔方二
軌而並入於是乎乃歷夫太階以造其堂俯仰顧盼東

西周章彤彩之飾徒何為乎浩浩汧汧流離爛漫皓璧
皜曜以月照丹柱歛絕而電烜霞駁雲蔚若陰若陽濯
濯燐亂煒煒煌煌隱陰夏以中處靈寥寂以崢嶸鴻煥
焜以燦閭颺蕭條而清泠動滴瀝以成響殷雷應其若
驚耳嘈嘈以失聽目矇矇而喪精駢密石與琅玕齊玉
璫與璧英遂排金扉而北入宵謁謁而晦暖旋室姬娟
以窈窕洞房叫窸而幽邃西廂踟躕以閑宴東序重深
而奧秘屹矍矍以勿固屑壓翳以懿凜魂悚悚其驚斯

心猗猗而發悸於是詳察其棟宇觀其結構規矩應天上憲背陬倨危雲起嶽峯離樓三間四表八維九隅萬楹叢倚磊砢相扶浮柱岩嵒以星懸漂羗岷而枝柱飛梁偃蹇以虹指揭遽遽而騰湊層櫺礧危以岌峨曲析要紹而環勾芝栢攢羅以戢晉枝掌扞牙而斜據傍天矯以橫出互黝糾而搏負下第蔚以璀璨上崎嶇而重注捷獵鱗集支離分赴縱橫駱驛各有所趣爾乃懸棟結阿天牕綺疏圓淵方井反植荷渠發秀吐榮菡萏披

數綠房紫的窰窰垂珠雲縈藻枕龍柄彫鏤飛禽走獸
因木生姿奔虎攫拏以梁倚仵奮豐而軒髻蚪龍騰驤
以蜿蟺領若動而躩踞朱鳥舒翼以峙衡騰蛇蟠蚪而
遠棖白鹿孑蜺於樽櫨蟠螭宛轉而承楣狡兔踞伏於
柑側猿猱攀椽而相追玄熊蚺蛇以斷斷卻負戴而蹲
踖齊首目以瞪盼徒眠眠而獠獠胡人遥集於上楹儼
雅跽而相對仵欺猷以雕吹頰頰頰而睽睽狀若悲愁
於危處惜顰蹙而含悴神仙岳岳於棟間玉女闥牕而

下視忽瞟眇以響像若鬼神之髣髴圖畫天地品類羣
生雜物竒怪山神海靈寫載其狀託之丹青千變萬化
事各繆形隨色象類曲得其情上紀開闢遂古之初五
龍比翼人皇九頭伏羲鱗身女媧蛇軀鴻荒樸略厥狀
昨盱煥炳可觀黃帝唐虞軒冕以庸衣裳有殊下及三
后淫妃亂主忠臣孝子烈士貞女賢愚成敗靡不載叙
惡以誠世善以示後於是乎連閣承宮馳道周環陽榭
外望高樓飛觀長途升降軒檻曼延漸臺臨池層曲九

成屹然特立的爾殊形高徑華蓋仰看天庭飛陞揭孽
緣雲上征中坐垂景頻視流星千門相似萬戶如一巖
突洞出逶迤詰屈周行數里仰不見日何宏麗之靡靡
咨用力之妙勤非夫通神之俊才誰能克成乎此勳據
坤靈之寶勢承蒼昊之純殷包陰陽之變化含元氣之
烟煴玄醴騰涌於陰溝甘露被宇而下臻朱桂黝儵於
南北蘭芝婀娜於東西祥風翕習以颯灑激芳香而常
芬神靈扶其棟宇歷千載而彌堅永安寧以祉福長與

大漢而久存實至尊之所御保延壽而宜子孫苟可貴
其若斯孰亦有云而不珍亂曰彤彤靈宮歸罪宮崇紛
尾鴻兮崩岩嵒釐岑崟嵒疑駢龍從兮連拳偃蹇崙崙
蹉蹉傍敔傾兮歇欬幽靄雲覆靈霽洞杳冥兮葱翠紫
蔚礪礪環瑋瑋含光晷兮窮竒極妙棟宇已來未之有兮
神之營之瑞我漢室永不朽兮

景福殿賦

魏何晏

大哉惟魏世有哲聖武創元基文集大命皆體天作制

順時立政至於帝皇遂重熙而累盛遠則襲陰陽之自然近則本人物之至情上則崇稽古之弘道下則闡長世之善經庶事既康天秩孔明故載祀二三而國富刑清歲三月東巡狩至於許昌望祠山川考時度方存問高年率民耕桑越六月既望林鍾紀律大火昏正桑梓繁蕪大雨時行三事九司宏儒碩生相與感乎溽暑之伊鬱而慮性命之所平惟岷越之不靜寤征行之未寧乃昌言曰昔在蕭公暨於孫卿皆先識博覽明允篤誠

莫不以為不壯不麗不足以一民而重威靈不飾不美
不足以訓後而示厥成故當時享其功利後世賴其英
聲且許昌者乃大運之攸戾圖識之所旌苟德義其如
斯夫何宮室之勿營帝曰俞哉玄輅既駕輕裘斯御乃
命有司禮儀是具審量日力詳度費務鳩經始之黎民
輯農功之暇豫因東師之獻捷就海孽之賄賂立景福
之祕殿備皇居之制度爾乃豐層覆之耽耽建高基之
堂堂羅疏柱之汨越肅坻鄂之鏘鏘飛欄翼以軒翥反

宇轍以高驤流羽毛之葳蕤垂環玼之琳琅參旗九旒
從風飄揚皓皓盱盱丹彩煌煌故其華表則鎬鎬鑠鑠
赫奕章灼若日月之麗天也其奧祕則翳蔽曖昧髣髴
退槩若幽星之纚連也既櫛比而攢集又宏璉以豐敞
兼包博落不常一象遠而望之若摛朱霞而耀天文迫
而察之若仰崇山而戴垂雲嗟瓌璋以壯麗紛或或其
難分此其大較也若乃高覺崔嵬飛宇承霓繚蠻黝霽
隨雲融泄鳥企山峙若翔若滯峨峨葉葉罔識所屆雖

離朱之至精猶眩曜而不能昭晰也爾乃開南端之豁
達張筍簾之輪幽華鐘杌其高懸悍獸仡以儼陳體洪
剛之猛毅聲訇礮其若震爰有遐狄鏐質輪茵坐高門
之側堂彰聖主之威神芸若充庭槐楓被宸綴以萬年
綈以紫榛或以嘉名取寵或以美材見珍結實商秋數
華青春藹藹萋萋馥馥芬爾其結構則修梁彩制下
寨上奇桁梧複疊勢合形離施如宛虹赫如奔螭南距
陽榮北極幽崖任重道遠厥庸孔多於是列髹彤之繡

桷垂琬琰之文璫螭若神龍之登降灼若明月之流光
爰有禁樞勒分翼張承以陽馬接以圓方斑間賦白疎
密有章飛柳鳥踊雙轅是荷赴險凌虛獵捷相加皎皎
白間離離列錢晨光內照流景外燁烈若鈎星在漢渙
若雲梁承天駟徙增錯轉縣成郭茹密倒植吐被芙蕖
繚以藻井編以綵疏紅葩鞞鞞丹綺離婁幽菖葩翕纖
縟紛數繁飾累巧不可勝書於是蘭栢積重窰數矩設
櫺檻各落以相承欒拱天矯而交結金楹齊列玉舄承

跋青瑣銀鋪是為閨闈雙枚既修重將乃飾槐栢緣邊
周流四極侯衛之班藩服之職溫房承其東序涼室處
其西偏開建陽則朱炎艷啓金光則清風臻故冬不凄
寒夏無炎輝鈞調中適可以永年墉垣碣基其光昭昭
周制白盛今也維縹落帶金釭此焉二等明珠翠羽往
往而在欽先王之允塞悅重華之無為命共工使作績
明五采之彰施圖象古昔以當箴規椒房之列是準是
儀觀虞姬之容止知治國之佞臣見姜后之解珮寤前

世之所遵賢鍾離之謙言懿楚樊之退身嘉班妾之辭
輦偉孟母之擇隣故將廣智必先多聞多聞多雜多雜
眩真不眩焉在在乎擇人故將立德必先近仁欲此禮
之不訾是以盡乎行道之先民朝觀夕覽何與書紳若
乃階除連延蕭曼雲征櫺檻丕張鈎錯矩成楯類騰蛇
相似瓊英如螭之蟠如虬之停玄軒交登光藻昭明騶
虞承獻素質仁形彰天瑞之休顯昭遠戎之來庭陰堂
承北方軒九戶右个清宴西東其宇連以永寧安昌臨

圓遂及百子後宮攸處處之斯何窈窕淑女思齊徽音
聿求多祜其祜伊何宜爾子孫克明克哲克聰克敏永
錫難老兆民賴止於南則有承光前殿賦政之宮納賢
用能詢道求中疆理宇宙甄陶國風雲行雨施品物咸
融其西則有左城右平講肄之場二六對陳殿翼相當
僻脫承便益象戎兵察解言歸譬諸政刑將以行令豈
惟娛情鎮以崇臺實曰永始複閣重闈猖狂是俟京庾
之儲無物不有不虞之戒於是焉取爾乃建凌雲之層

盤浚虞淵之靈沼清露瀼瀼淥水浩浩樹以嘉木植以
芳草悠悠玄魚皦皦白鳥沈浮翔翔樂我皇道若乃蚪
龍灌注溝洫交流陸設殿館水方輕舟篁樓鷗鷺瀨戲
鰕鮒豐侔淮海富賑山丘叢集委積焉可殫籌雖咸池
之壯觀夫何足以比讎於是揭以高昌崇觀表以建城
峻廬宮堯岑立崔嵬巒居飛閣干雲浮階乘虛遙目九
野遠覽長圖俯看三市孰有孰無覩農人之耘耔亮稼
穡之艱難惟饗年之豐寡思無逸之所歎感物衆而思

深因居高而慮危惟天德之不易懼世俗之難知觀器
械之良窳察俗化之誠偽瞻貴賤之所在悟政刑之夷
陂亦所以省風助教豈惟盤樂而崇侈靡屯方列署三
十有二星居宿陳綺錯鱗比辛壬癸甲為之名秩房室
齊均堂庭如一出此入彼欲反忘術惟工匠之多端固
萬變之不窮物無難而不知乃與造化乎比隆讎天地
以開基並列宿而作制制無細而不協於規景作無微
而不違於水臬故其增構如積植木如林區連域絕葉

比枝分離背別趣駢填胥附縱橫踰延各有攸注公輸
荒其規矩匠石不知其所斲既窮巧於規摹何彩章之
未殫爾乃文以朱綠飾以碧丹點以銀黃爍以琅玕光
明熠燿文彩璘璘清風萃而成響朝日曜而增鮮雖崑
崙之靈宮將何以乎侈旃規矩既應乎天地舉措又順
乎四時是以六合元亨九有雍熙家懷克讓之風人詠
康哉之詩莫不優游以自得故淡泊而無所思歷列辟
而論功無今日之至治彼吳蜀之湮滅固可翹足而待

之然而聖上猶孜孜靡忒求天下之所以自悟招忠正之士開公直之路想周公之昔戒慕咎繇之典謨除無用之官省生事之故絕流遁之繁禮反人情於太素故能翔岐陽之鳴鳳納虞氏之白環蒼龍覲於陂塘龜書出於河源醴泉涌於池圃靈芝生於丘園總神靈之貺祐集華夏之至歡方四三皇而六五帝曾何周夏之足言

景福殿賦

韋誕

瞻大夏之穹崇結增構而高竦修棟廸以虹指飛甍竦
而鳳翔榱桷駢逼以星羅軒檻曼延而悠長伏應龍於
反宇乘流蘇以飄揚於是周覽升降流目評觀叢楹負
極飛檻承欒桁梧綺錯梁枕鱗攢芙蓉倒植藻井懸川
望舒涼室義和溫房玄冬則暖炎夏則涼總寒暑於區
宇制天地之陰陽又有外城金狄詭貌殊姿列於應門
肅有容威若乃離殿別館燦如列星安昌延休清宴永
寧美百號之特居嘉休祥之令名步雕輦以逍遙時容

與於蘭庭又有教坊講肆才士布列新詩變聲曲調殊
別吟清商之激哇發角徵與白雪音感靈以動物超世
俗以獨絕然後御龍舟翳翠蓋吳姬擢歌越女鼓柁詠
采菱之清謳奏淥水之繁會

景福殿賦

魏
夏侯惠

周步堂寓東西春晒綵色光明燦爛流延素壁皜養赫
奕倩練爾乃察其奇巧觀其微形欽崱紆曲盤牙敬傾
或天矯而雲起或詰屈而環縈衆木附枝以連注樂梧

倚亞而相經若乃仰觀綺牕周覽菱荷流采的皪微秀
發華纖莖葳蕤順風揚波含光內耀婀娜紛葩曾櫨外
周棖桷內附或因勢以連接或邪詭以盤構於是乎飛
閣連延馳道四周高樓承雲列觀若浮挹朝露之華精
漱醴泉之清流

華林清暑殿賦

宋孝武帝

若夫瑤樹未清瓊室流炎薰風夕烈熾景晨嚴高巒廢
駕遊衢輟轡思延寒於夏堂豈徒聞於遺籍伊涼燠之

可變粵在今之猶昔密盼林梁側眺池籞起北阜而置
懸湖沿西原而殿清暑編茅樹基採椽成寓轉流環堂
浮清浹室闢西櫺而鑒斜月高東軒而望初日粵乃炎
精待戒青祇將畢濯楔在辰風光明密婉祥鱗於石沼
儀瑞羽於林術浮觴無屈展樂有時惟歡洽矣含歌受
辭歌曰山懷風兮谷吐泉清潭邃兮遠氣宣符深情兮
應遙心促千里兮測雲天

華林清暑殿賦

宋

何尚之

逞縣亘之虹梁列雕刻之華棖網戶翠錢青軒丹墀若
乃奧室曲房深沈冥密始如易循終然難悉動微物而
風生踐椒塗而芳溢觸遇成宴暫遊累日却倚危石前
臨濬谷終始蕭森激清引濁涌泉灌於階祀遠風生於
楹曲暑雖殷而不炎氣方清而含育哀鵠唳暮悲猿啼
曉靈芝被崖仙華覆沼

華林清暑殿賦

宋 劉義恭

構禦暑之清宮傍測景之西岑列喬梧以蔽日樹長楊

以結陰醴泉湧於椒室迅波經於蘭庭叢芳芝以爭馥
合百草以競馨飾丹壤以和璧加疏楯以連城至於朱
明在運鬱夕囂晨寒堂涼結清觀風簾覽茲寓之靈緯
啓聖情以寤神豈宣曲之妄擬焉甘泉之足陳

殿賦

梁
蕭統

觀華曜之美者莫若高殿之麗也高殿博敞華色照朗
內備雜藻外發珍象延眎觀之欣然俯仰闌檻參差棟
宇齊畧玄黃既具鮮麗亦發椽并散節若山若谷或象

翔鳥或擬森竹藻枕鮮華而繁色山節珍形而曜目旅
視刑則委累嵯峨雕丹文於簷際鏤華形以列羅若乃
日照珠簾彪灼爍輕風吹幌乍揚乍薄接長棟之耿
耿簷垂溜於四隅建廂廊於左右造金墀於前廡卷高
帷於玉楹且散志於琴書

含元殿賦

有序

唐
李華

宮殿之賦論者以靈光為宗然諸侯之遺事益務恢張
飛動而已自茲以降代有詞傑播於聲頌而無聞焉夫

先王建都營室必相地形詢卜筮考以農隙工以子來
虞人獻山林之榦太史占日月之吉雖班張左思角立
前代未能備也而曩之文士賦長笛洞簫懷握之細則
廣言山川之阻采伐之勤至於都邑宮室宏模廓度則
略而不云其體病矣至若陰陽慘舒之變宜於壯麗棟
宇繩墨之間隣於政教豈前修不逮將俟聖德而啓臣
心輒極思慮作含元殿賦陋百王之制度出羣子之胸
臆非敢厚自夸耀以希名譽欲使後之觀者知聖代有

頌德之臣焉其辭曰

維皇高祖穆端命於玄穹萬有千載鍾景祚於鴻裔建
北宮之尊嚴上取法於天帝乃圖正殿之迨居規崇山
而定制信神明幽贊而人謀襲契不然何前王曠此之
雄麗也先是大司空帥其屬執度而相之曰美哉川原
驚乎其大哉亘坤靈兮配乾剛坤順乾而為龍舒廣衍
兮走羣山紛却面而朝宗陵正陽之奕奕鬱佳氣之葱
蔥蓋昊天之作而皇祇授元聖獲以造新宮也乃審於

龜筮龜筮叶從太卜以告神人咸同皇曰欽哉是將宜
於朕躬因以鴻稱含元建名易乾坤之說曰含弘光大
又曰元亨利貞括萬象以為尊特巍巍乎上京則命徵
般石之匠下荆揚之材操斧執斤者萬人涉磧礫而登
崔嵬擇一榦於千木規大壯於喬枚聲坎坎於青雲若
神蹈而顛摧勢動連崖拉風碎雷倒勁梢於窮谷斬巨
柢於昭回時也山祗效靈波神作氣為桴為棹羽疊鱗
萃朝沈江漢夕出河渭雲奔山橫交積於作宮之地於

是農事既收靈臺勿亟子來而就役者周邦畿而薄四海咸忘勞而獻力乃張為廣度考正極星邦伯是經國工研精剡盤岡以為址太階積而三重因博厚而順高明築陵天之四墉四墉既列太階如截下上相欽愕視沈沈其始也星鉞電交於萬堵霜鋸氷解於千尋擁材為山攢杵如林乃占日月之吉以成帝室雄梁勁於中楹棖栢戢以礪密析始繇以為楹隳喬山以為礪飛重檐以切霞炯素壁以留日神標峻摘鬼疊層楣高卑迭

作尋尺相持木從繩而後正棟操宇而不危陞瑩冰級
瓦數鱗差蕩晶景而升降歛暎暘以交輝聳大廈之奇
傑勢將頓而復飛爰詔有司練日推時徵考室於周詩
會公卿以落之不赫哉如俯如跂若會若離森修邃以
官徵悅業駭而巖巍謂衝飈激海兮漩淵淪以無底奔
雷觸山兮掉巘穹而傾敝石鮫拖首於堂廡狀出雲而
撐鬐嵩高之制靈丘上盤隣斗極之光耀邇天漢之波
濶察鑿枘之吞吐吸山叢而水攢建升龍之大旆邈不

至於階端崢嶸孱顏下視南山照燭無間七耀迴環歛
欽赫以突兀擣閼弘以蕭撥捧帝座於三辰衝天街於
九達進而仰之騫龍首而張鳳翼退而瞻之爰樹顛而
萃雲末疑兮莪莪巨鼇戴仙山而出滄波劃兮煌煌燭
龍折穹穴而臨北方排層城而廓帝居豁閭闔而面蒼
蒼左翔鸞而右棲鳳翹兩闕而為翼環阿閣以周墀象
龍行之曲直夾雙壺之鴻洞啓重闔之呀彪趨堂塗而
未半望宸居而累息惟上聖之欽明爰聽政而崇德去

雕幾與金玉紉漢京之文飾熾丹雘於峻嶒抗重霄而競色若乃紫微晨暄彤墀夜明雲薄萬栱風交四榮冬止其陽則釋裘而燠夏休其輿則捐絺以清旂獵風而振響葉墜露而成聲懸樞駢湊疎柱奔列複檻曾綴高牕景熱駢日翳而罍連曜天開而中絕形持神而欲離足悽步而將跌貯昭訓之崇崇璘光範之揭揭其南則丹鳳啓塗遐矚荆吳十扇開閉陰陽睚眦容鼎九局方駕五車示王者之無外不樹屏於清都望仙闕於吳維

建福敞於坤隅偃朱旗而橐玄甲屯仡仡之驍夫其後
則深闡祕殿曼宇踈楹瑞木交陰玄墀砥平鮮風歷廡
凌霰飄英蔭藹武闈增華穆清玉燭內融則嘉盛豐備
太陽臨照而天下文明古有六寢御茲一人今也三朝
繇古是因布大命於宣政澹玄心於紫宸義和弭節於
通乾望舒停景於觀象密勿旒宸臣人是仰左黃閣而
右紫微命伊臯以為長其下則鵬冠魚服良家大族厲
禁非宜金吾領之其前則置兩石以恤刑張三侯以興

武告善之旌登聞之鼓節晷漏於鍾律架危樓之筍簴
以辨內外之差以正東西之序天光流於紫庭倒影入
於朱戶騰祥雲之郁靄映旭日之葱龍清渠藻於元氣
玉樹生於景風夷坦數里徘徊無窮羅千乘與萬騎曾
不得半乎其中厥初經營天下既乂文物未周孤其壯
麗益重於施勞非不懷也乃眷睿孫睿孫開元萬物晏
清而太和掩書契之所論既克廣於崇構聲明備而益
尊益聖皇之孝也輝焯變化兮動搖乾坤其東於是弘

文教而開館對日華之清閼益左學之遺制協前王之
講德其西於是延載筆之良史俯月華之峻庑集賢人
於別殿朝命婦於中闈王風闡而成化陰教備而不虧
加以詠周詩而展親睦魯衛而敦叙因合族而來宴置
更衣之豐宇至於殿內諸曹則左右有局通軒並廡物
有恒司供無廢舉又有銀璫珥貂寺人蒼伯奉宣出納
之令更踐宮中之役熊羆之旅董以龍武矛戟森森材
官羽林聲破丘山氣龍飛沈爪挾千鈞跟騰百尋克壯

皇威協比其心其外則校人掌馬天駟在閑以備順遊
放牧其間望我鑾和陟彼高山猶慮憲章或遺國容未
備乃立掌匭之司館通事之吏職在達下情於上天倣
王言於有位堦通太極墜指龍池重門內注複道潛移
幽峻肅以相屬光彤融以熤熤懸象著明帝座維三皇
居設位俯察仰參翼室正中游宮次南乃起含元其容
耽耽總而言之如山之壽則曰蓬萊如日之昇則曰大
明自茲而北燕遊所經達於苑囿不可殫名周廬更呵

匝以環衛南端百仞上極霄際却視耽崙經塗廣深繚
以層城黝為重陰至若時雨膏田九農悵暢雲歸山穴
儵以昭曠白日麗於宮隅混晶光而益壯於是風師斂
威纖燄不升穎絕搖芒葉無翻稜自中徂外鏡洗川澄
弦直間閉井畫溝塍靡迤秦山陂陀漢陵知稼穡之艱
難見皇王之廢興及乎玄冥戒寒海神飛雪瑤城粉野
琪樹森列玉宇璇階雲門露闕天華爽霽朗日朝徹赤
旌降庭朱柱艷月仰白帝而金精開披河宮而銀燭發

其或蠻夷不至帝用興戎降元帥於天上發神謀於禁
中皇靈震耀殄厥渠凶矯矯武臣此焉獻功操俘虜以
陳器械恢莫大之威容爾乃時殷仲冬日正南至上公
奉罽羣后在位一人壽昌萬國承賜式燕以樂欣欣具
醉乃撞宮懸礪碣天地及乎獻歲元辰東風發春懸法
象魏與人惟新儼文物於王庭兼九伐而宿陳威儀之
嚴嶽嶽振振若太一披網緼而俯百神既而咸造勿褻
會朝清明璿柄指寅寢闈發局皇帝御袞龍之法服佩

蒼璧之純精執鎮珪導朱紘降輦登階微聞玉聲於是
典禮之官贊王就位南面穆然至若甸侯采衛要荒閩
貉輸其方賁罔不來格統以千官六卿二伯司儀叙進
象胥儼譯肅肅委皮乾乾奠璧設以庭燎天烘地赫雷
鼓殷殷朱干玉戚神簾如生熊羆睟敵危昂歌向歆爛
歆射金根玉輅太常少伯火列門旂霜交陛戟乃進元
元以觀禮瓊億兆之增增金吾南首麾之以肱遞攀援
而聳仰齊屨企而冠騰太史來告卿雲勃興灑豐澤於

生人答上玄之休徵申命司寇綏刑冢宰降德秩山川
而問耆老周雨露而均邦國華戎竭歡喜氣聞塞揭金
雞於太清炫晨光於正色慶欣之聲不踰辰而雷四域
當斯時也驅周驟漢於廓煥爛王臨於朝天地貞觀靈
宮巖巖上下交贊益所以法乾道而遵帝度豈惟安體
而明威者哉夫瑤臺之美不可以刑萬國土階之陋不
可以儀天下奢不遜而儉固允執中於大位洪範曰皇
建其有極富哉上聖之宏議也詩歌楚室頌美泮宮諸

侯之事也雲夢甘泉宴談景福辟王之志也論諸侯曷
若以戴天子嘉辟王曷若以尊聖人烈烈盛唐祖武宗
文五帝赧德六王慙勳而政本乎慈用過乎儉夫蒼生
所奉者惟君所愛者惟親寧有君親宅體於卑室而臣
子得安其身乎故有熊明庭帝姚總期從人欲也天垂
定星易有大壯君人法焉聖朝猶斥其華而憑其質今
為是殿也惟鐵石丹素無加飾焉身居玄眇心與萬姓
同畎畝之勞以是臨衆何衆不賓以是享神何神不若

其天德歟雖欲宮崑崙而館不周城八極而隍四海猶未足儲鴻醇而俯丕耀宣咸鎬一京之所在策四瀆之前歲敕懷鉛之小臣俾儻書於禁中正百代之遺文由是循環天造耳目日新敢頌成功告於神明無愧斯干之什式昭聖德之容頌曰帝作含元含元言言萃若日觀呀為天門太階三層遠法崑崙鎮茲秦野揭以周原烈文祖宗永錫孝孫孝孫有慶於以施令奄甸萬姓受天休命歌之頌之管磬宜之穆穆皇君壽考無期既成

斯丈客有勸之上者對曰前王之宏祥詭瑞乃聖朝之
細事今休徵已厭於聰明頌聲亦飫於天意夫私歌竊
拊乃臣子之常志又焉足以薦聞哉客曰不然今至尊
明發不寐永懷先皇周文之孝也允恭克讓光溢海內
堯帝之謙也自即位已來上下之休嘉臣人之詠歌歌
於睿躬則固辭頌於宗廟則無數今吾子之文昭乎累
聖之耿光美於大君之孝德可進而退宜言而默使雅
頌之音卷而不舒猶坦蕩其胸臆無乃過歟為人之下

者有可達乎君親雖濱於死亦冒行之況宗廟或啓其
心乎臣華嘗聞遷善之規願附升歌之末

明光殿粉壁賦

以上春早朝伏
奏青蒲為韻

唐樊

鑄

粉潔白兮壁宏壯白者取潤色於明光壯者取雄居於
君上成巧人之手澤起漢皇之心匠凝雪彩耀冰狀展
旒居際謂分照於此日之君冠劔朝時欲和光於為鹽
之相茲殿攸起不無所因寧在於白亦以象真守靜含
虛上以隣貞明於千年之主保純不汚下以範恬淡於

萬國之臣煥北極而開瓊室激南風而生玉塵月桂低
檐失蟾暉於午夜御柳垂砌惹絮色於三春則知粉壁
之道齊乎玄造達上下而明明通晝夜之杲杲日昃之
後慰天勤而暝遲夙興之時副聖恩而曙早信可大而
可久實永堅而永好懿夫榮雖

原本闕
一字

畫飾不至驕挺葉

炭以莫變洞閒華而自昭可使楚客具瞻羞持練而稱
獻荆人仰止恥懷寶而來朝豈止光動玉戶氣射金屋
秋露懷慙冬霜自伏蛾眉夜侍意瑤臺之已升玉顏曉

臨若瑞雲之相逐而已哉觀夫匱匣皎晶迴環廣袤濃
潤交翕浮華相透處高莫蔽通四目之數求含明必竟
受百官之草奏雖奢儉不失精研克構終未可小桂椒
為糠粃汰茅茨為阨陋然為用因有貴飾形居安撫極
抱素常寧色不喪真久已生於虛白白能受采冀一及
於丹青噫漢皇立則未足為模我聖作範實謂殊塗象
為壁兮則搜材於豫章之器代其粉也則聚賢於堅白
之徒以張皇二儀為光明之殿以照耀四海為粉壁之

隅故錯薪從楚安輪以蒲是得趨於金馬希便維於白駒

鴻慶宮三聖殿賦

有序

宋 劉 敞

臣伏見陛下追述祖考崇奉明祀新作三聖殿以昭孝明功於天下臣以文學中第太常試官祕書目覩盛事不敢以鄙薄自絀輒作古賦一篇歌詠盛德昔靈光景福之作世稱其美麗然其所謂壯大不出乎雕刻畫繪文彩之煌煌而已又盛道工人之巧民力之衆材木之

多金玉之偉臣以謂聖王有作則必智者獻其巧壯者輸其力山林不敢愛其材府庫之聚皆所供億也是物理之常不足以夸大臣愚竊陋之若夫天命廢興之際聖王授受之符非敏智通達未有能究知其始終者固難為寡見淺聞者道也臣竊大之是以略所陋而張所大不敢仰希風人雅頌之列庶幾有其志云爾

蓋上帝之所選建明聖命以天位者乃所以享德而報功未有德盛於前功播於後而其子孫寂寥千載無聲

者也賢哲所談六籍之云德莫著於有虞功莫隆於五
臣禹平水土夏姁以家司徒后稷是教是食肇商興周
歷載累百皐陶大理五刑以明於其苗裔乃興於唐若
夫董鵠耀以攸司奏庶民之鮮食焚山烈澤害服妖息
鳥獸咸若草木允殖固伯益之力焉天報以位俾秦繼
周於其子孫誣祖不紹去火即水叛禮尚刑法以慘急
然猶兼六國一天下而不知變於初二世以斃非天不
相朕虞之後乃其否德得罪於祖而斷棄也惟伯益之

功未報是以天命復集於趙氏焉五代喪德九土分裂
海水橫流民用墊溺鳥獸昌熾黔首失職滔滔惑惑益
若洪流之未闢於是太祖乘火而帝繼益之功天昨吉
土曰惟商丘是為星火大辰之居亦曰明堂布政之由
出潛離隱或躍在淵以有九有百度正焉削禍戡亂出
民塗炭風指日舒天地正觀荆燕吳蜀楚越并冀懾威
懷仁奔走失氣屈强者執服柔從者加賜太宗承之真
宗成之登封降禪矢直砥平巍巍乎邈三五而儔儷彼

漢魏之瑣瑣曾何比京夫伯益始掌火而底績而宋以
火帝興於火墟天之報施豈不昭昭可推而類也哉且
夫積功以凝命而創業因物以胙土由土以建號樂以
反初禮不忘其本是故作於原廟建之別都三聖鼎列
大廈以居以答景貺以昭成功俾子孫知厥所由億兆
仰德而不窮也厥後烈風雲雨電雷震曜儆戒於下濫
炎流燒天子怵於大異反已正德伏念七年乃其有得
曰天以德訓予而以威震予依類託喻予敢不信夫政

不變不足以化新禮不修不足以化民天之示人若曰
政禮之敝雖祖宗之為猶當勿憚乎改更於是詔三事
飭九卿和布於舊載損載益以答天誠以舉聖職夫既
天行而日白矣乃復閼宮獎夫神衷三后在天對越上
宮經之營之不日成之閼偉奇麗宮寢之勿踰也清閒
宥密鬼神之所都也絜百圍而置楹兮度千仞以架棟
擇一木於萬章兮顧餘羨者猶衆般倕獲人之儔獻巧
而林立兮莫不心競而實用亘長廊其如城兮闢重門

其似洞欒拱粲其如星兮侏儒屹其承重如翬斯飛如
鳥斯革兮誠可慄其將動闔陰房之密靜兮雖六月其
必寒闕陽榮之敞麗兮蓋中夜而已旦陟廣除而徑上
兮每百尺而一級歷青珉之瑩滑兮曾不得而側立顧
風雨之在下兮足以避夫燥濕良非人力之所為兮宜
鬼神之攸集於是使夫設色之工後素之巧想像形容
圖寫必效夫其龍顏日角天質之顯昂兮臣乃今知真
人之異表於是駕鑾輅登玉虯千乘萬騎雲動而景附

兮想生平之豫游旂常繽紛以施翕兮鐘鼓軒輶簫管
發而啁啾雜魚龍之奇技兮蜿蜒曼延於道周百神紛
而並迎兮出閭闔而御夫龍舟爾乃川后靜波屏翳息
風舳艫相銜若複道之延屬兮亘千里而相通百工備
官而夙設兮懼夫謹呼而奏功惟吉行之五十兮餘日
力而靡窮既屆既止威儀若初以幸夫壽宮乃即前楹
以修祀事威神如在望之可畏殫金玉以備用罄飛潛
以薦味帷帳莞簟之安肆几杖筆研之儲侍靡一物之

蓋闕兮所以廣孝思而盡心志守臣侍祠罔不殫飾既
事而旋閔而莫覲列仙之儒倕侏之倫迎神頌祇於其
側若夫祝融重黎相土閔伯固已喜動乎魄情見乎色
護清蹕而晞盛德也巍巍大哉不可得而記已且夫天
命之不忘人主之大寶也祖宗之有繼子孫之勿替也
茲聖王所以繼統垂業超商邁周卹嗣錫羨貽厥孫謀
使萬有千歲得以希風而承流也遂作頌曰崇崇商丘
大火主兮曰宋之興道是配兮建邦設都以有九土兮

有皇上帝明德輔兮伯益之功邈不可忘兮三聖承承
有烈光兮奕奕寢廟神翱翔兮于胥萬年尚無疆兮

慈寧殿賦

有序

宋

王仲言

臣聞乾天稱父坤地稱母天地至大必言之以父母者
明其尊崇博厚無以加也是以圓首方足皆仰之肅之
欲報欲奉無不極盡繇古以來聖人之盛莫過堯舜而
孟子以為堯舜之道孝悌而已矣恭惟皇帝陛下繼大
人之照宜日中之豐體堯邁舜憲古明王以治天下發

為號令典誥廟謨宸斷親仁善隣開物成務者莫不以
孝為首臣聞孔子謂曾參曰明王以孝治天下故災害
不生禍亂不作仰惟陛下曩者以皇太后扈從未還願
見之心致軫宵旰四方兆民延頸指日以冀來音久矣
斯焉天人交孚隣邦修睦橐弓箠矢息師偃革寰宇之
間遂臻安堵恭奉駟駕言歸闕庭凡在動植孰不手舞
足蹈翼鼓膺奮遙觀古初曩無前此臣伏以老氏三寶
以慈為首乾元之道萬國咸寧洪惟慈寧之殿合為嘉

名超軼前世致安之道由是以始形勢制作煥乎其有
文章儀刑萬邦風化際薄無所不及若堯之光被四表
舜之不冒海隅蒼生者行見於今日甚盛烈也臣生長
當世薰陶漸摩德義之久目覩心欣不能自己思欲頌
良圖協恭式化成規誠開金石感動遠邇以彰聖治莫
大之慶而昭述巨美者有日矣輒因殿之名以推原萬
一至於辭意淺陋言語膚率不能抉竒摘異以為偉不
惟不能亦有所不敢也臣謹昧死再拜而作賦焉

臣恭惟皇帝之嗣位十六載也海宇澄清四方底平受
上天之眷命紹洪基於大明邇安遠至措刑寢兵人熙
熙兮春臺物蕩蕩兮由庚六服承德衆心成城所以復
炎德之輝而迓周邦之衡先是駟駕從狩隣國克享天
心咸有一德式遄來歸懽動九域乃命羣工擇基之隆
儲祥之勝圻建問安之上宮列辟肅然而赴職百執蹌
然而效忠爰即行闕以成厥功於是上高擬天下蟠法
地削甘泉之繁縟屏含元之侈麗揆太極之宸模就坤

靈之寶勢乃諏龜筮龜筮協從乃稽萬物萬物無異帝
曰欽哉乃彰鴻名慈以覆育於天下寧以鎮服於寰瀛
蓋將昭徽音於太姒而表思齊於周京者也有嚴有憑
或降或升揆之以日筮之登登經始勿亟百堵皆興伎
者獻其技能者精其能否往兮泰來閭決兮垠開蒼昊
馳耀兮黃祇助培運郢石之斤斧攻杞梓之良材萬杵
散雨兮千鑱轉雷離婁督繩兮公輸削墨夏育治礫兮
孟賁掇茲聲隆隆兮伐喬枚勢輶輶兮豁層崖長林巨

植兮千年之產而萬年之材輾如闕直如矗今崔嵬於
時山壤獻靈川流效祉陸架水浮風屯雲委輻湊鱗集
衡行櫛比以萃於殿之址也於是匠氏經營百藝駢并
礪焉而礪礪焉而礪高下曲折塗墍丹青此興造之本
意而動作之形容也既而四周凌天而岌業九門參空
而伶俜闕百常兮屋十尋皆捷爵兮建瓴儋儋千栢閑
閑旅楹岫綺對砌牕霞翼樞形墀洋洋金碧煌煌神鵠
展吻而呬呀文犀壓牖而赫張寶璫象拱列星間梁櫨

桐欒淩黼藻鉛黃玫瑰玳瑁翡翠明璫方疏圓井瑯連
斗扛枿欒上承柱石下當騰雙猊兮盤礎刻怒兕兮伏
相其蟠也顏九淵之虬屈其翥也若干仞之鳳翔或倒
文漆於衛社或薦孤桐於嶧陽烏枅橫截紺蘂交相第
栲栳與椅榎積梗枿兮豫章蓋天下之奇榦盡羽粲而
國欒夫然未足以比其制未足以形其雄轆轤龍從飛
雲架空出入兮日月吸呼兮雨風開重軒兮纍玉鱗萬
瓦兮游龍高下髮直左右翼從西八東九金礫珉鎔平

寫三山之景坐移羣玉之峰喜洩洩兮樂融融入如遇
兮出如逢映斗杓而瞳矐挹天漢兮春容觀其巨鎮在
南長江在東前擁後顧盤錯窪隆占皇圖之奕奕鬱佳
氣之葱葱天海相際造化溟濛雕題貫膂大舩舸艘尋
槿戴斗兮航浮索援皆馳驅而致恭采肅慎之楮矢職
夷黔之布實上則天目於潛之山鳳凰南北之巔巉巖
截薛窈窕回旋狀羣羽之集麓若萬馬之奔川海門之
潮滄溟之淵濠洶奔放勢如朝馬皆足以小峭函而吞

涇渭等河雒而隘隴岍夫以此而駐蹕實一制而萬全
然而不以為離宮不以為別宇而獨以奉長樂之安而
為承顏之所故能遠邁漢唐跨歷三五則雖兼天下之
奉極天下之貴亦人所樂而天所與也凡臣所鋪翼而
陳之者尚可名言之也非此三吳之盛麗九斿之容衛
六宮之深嚴萬物之修治不足以隆一人之孝於無窮
於是俯而拜仰而重曰當乎法駕言歸宗祏生輝千仗
萬騎如指如麾備一時之盛禮慶萬國之洪禧望閭闔

兮瑞霏微剗觚稜兮祥歲駢馭嚴嚴之玉輦建獵獵之
朱旗華蓋效杠天驥驂駢增日星之光明聞老幼之提
攜千官之班兮駕騖兆民之欣兮嬰慕喜慍動於堪輿
澤周流於道路樂極者或至於抃躍感深者爭先於馳
騖汨湔湔晏然兮屏翳收風變變不興兮豐隆霽怒雙闕
敞兮如升萬室昂兮如沂若乃萬壽誕日之辰一人會
朝之際濟濟峨峨羣臣在位皆輔臯而弼夔過房杜兮
丙魏奉玉卮兮瓊覽展采儀兮文陛皇帝躬蹈事親之

美以獨高於萬世進退禮樂抑崇下貴隆帝業兮億載
歡祝聖人兮千萬歲然後數茲睿化徧於中下尊卑模
範兮盈里閭膏澤滲漉兮盛王霸工在衢士在朝而農
在野百度修明萬幾閒暇無有遐遺睦如姻婭四海安
若覆盂九有基如太華於是有客相謂曰子聞今日之
盛事歟曰然嘻為堯舜神人以和運紹五帝獄訟謳歌
但無為而已矣於致養以云何豈若我皇躬勤儉之資
恢隆平之時約已以奉太母之訓致美以化羣黎之為

端一心而應感斥衆異之吁咤煥爛方冊照溢詩書哉
且客聞歷代之制乎土階之卑不免乎險固雕椽之飾
不免乎驕奢魯夸靈光而但述土木之巧魏稱景福而
徒為制作之華俱游觀之是云奚文辭之足誇又豈若
我皇綏定邦家以成孝道允紹義媯哉且上棟下宇聖
人所取也至德要道聖人之孝也作於楚室能修泮宮
諸侯之功也與其論諸侯昌若言聖道與其言雄壯昌
若言聖德明明我宋得天下之統烝哉祖宗膺器之重

殆二百年休聲無墜下之所奉者惟君上之所承者惟親當君享九重之實而親安萬乘之尊蓋匹夫之孝曾閔所難不足以言惟據域中之大饗天下之養然後為重也已析而合既失而得然後為喜之至也曠古所無一旦在已漢唐所恨自我而得凡是數者兼而有之不特為四方之賀又將為萬世之光寵也今是殿也不奢不陋不高不卑合禮之界與天下齊以是為固鞏於鼎龜以是為寶保若山谿雖廣八荒而為城開溟渤而為

池倚圓天而為蓋立棟梁於四維亦奚有宜乎於是再
拜而歌曰蒼蒼高旻覆下民兮與物為春澤無垠兮一
人孝至通帝意兮金石可開不可移兮上下合契定大
議兮法駕大駟言還歸兮勅以慈寧為殿名兮厥功告
成百室盈兮居之克安若石磐兮四方瞻觀化益寬兮
天人合應助其證兮光啓中興祖武繩兮紹復大運法
堯舜兮旋澤曲軫翕然順兮孝道克全鑒上天兮壽祿
萬年其永延兮聖人孝兮感人深責成賢輔兮雋功克

忱廣殿軒軒兮巨厦深沈晨昏之養兮萬乘親臨財豐
物阜兮寫於薰琴百姓克愛兮諸侯克欽亘萬國兮得
其歡心宮殿之制已陳之矣天子之孝既備述矣四方
之心見於斯矣口軟字碎其言卑矣欲昭聖孝永無極
矣日月為宇天為卑矣

皇極殿賦

有序

明
徐顯卿

粵若太祖高皇受命作京營金陵而定鼎殿曰奉天迨
成祖文皇北建行宮仍揭前額厥後因以定都歷七聖

而未之或改稽古唐虞繼治總章合宮各殊名號漢世
東西兩都宮殿不相沿襲迄我世宗肅皇之季始承天
意而鼎新之榜正殿曰皇極標建極中極以更謹身華
益而左右二順則以會極歸極題焉益取洪範五居中
宮曰皇極惟皇建極惟臣會歸之義也大哉皇言於斯
為至矣然時方恭默西寓未遑暇臨欽惟我皇踐祚始
於斯殿朝萬國而莅四海焉惟皇天錫我皇以皇極之
統惟皇考貽我皇以皇極之基天人景從後先光裕猗

歟郁哉昔在帝皇創制殿宇臣工必有詩頌以聲歌其
盛周之靈臺尚矣魯之閟宮續焉乃若何晏之賦景福
徒紀魏闕之壯麗適以昭侈靡示無度耳魯恭位居東
藩乃靈光見於王逸所贊述者顧僭擬天子又奚法焉
惟我明皇極之建物采以別威朴素以崇禮赫赫巍巍
平平蕩蕩直軼百皇而獨盛參三極以婉隆者哉迺作
賦曰

惟皇御歷辨方體國重闢明堂創號皇極詎云規矱之

壯麗僉曰名義之周敕磅礴黃壤以北塊塉峽青霄而
矗峙瑤岑碧巘匝乎其周遭象緯龍纏森乎其旁逼
天衢之寥廓坦王道之平直其為狀也浩浩汧汧鑠鑠
奕奕雲籠日耀窈不知簷牙楣額之幾千萬億其稱名
也協箕疇準禹策包雒緯之奇文體洪範之奧則萬象
周羅而環繞天樞五位居中而密運乾德儼兮伉兮四
皇六帝而並域恍兮忽兮參天兩地而作式吁其盛哉
余亦烏能管窺而蠡測第規模之弘遠博碩詞人之數

演極矣茲將循名討義而商榷陳之以俟咨訪於多識
蓋嘗仰而觀法於天碧落虛浮葱翠空靄斯殿也薇垣
端拱而法象中懸旋轉玉衡宰幹璣璿攝二曜以升沈
齊七政而推遷三十二星屯方而列署二十八宿按度
而分躔闡閭闔以啓扉絡勾陳而張紼茲實昊皇之垂
象於是乎天極立焉俯而察理於地岳蒿隴蒨瀚渤澥
涎斯殿也輿圖輻湊而效法承乾元精耿耿而中貫坤
粹勃勃而漪漣莫四維而鎮九壘控六合而扼八埏渾

大塊以宅中表崑崙而居巔上接玉樓層臺之十二下
該赤縣寶界之三千茲實后皇之奠宅於是乎地極立
焉中而考度於人洪荒抱樸渾沌含玄泰駟大庭之世
有巢無懷之先林居穴處鵠宿鷗眠惟聖作極民用始
全屋廬星周闔閭鱗駢然後宅中圖大矩方規圓鞏河
山百二以定鼎環畿甸九一以卜年總章闢而青陽啓
明堂敞而重室宣三十六戶豁乎錠呀七十二牖軒乎
擘蜺熒兮嚮南離以重明巍然象北極而中天茲實皇

王之撫圖於是乎人極立焉茲三極者實皇極之所以
取則也爾獨不觀梓人之引繩而糾室也五材並蓄百
役兼并棖題規枳栲桷梧桁條梁短枕檠戟飛甍壁礎
玉碣文璫金楹欒拱天蟠而斗拱櫺檻錯落以星明惟
屋極居棟隆而獨重凜然昭君象而崢嶸是故易有太
極兩儀判而八卦生範有皇極九疇叙而五福凝人有
心極泰宇定而安宅寧居有屋極羣材附而大厦成極
之名義大矣哉匪皇皇我后昌以顯錫斯名方斯殿之

鼎新也定星炳耀日晷流明天帝下觀太一垂晶敕公
輸督墨而削繩詔離朱馳巧以騁晴工共總其矩度匠
石察其軌程黃道開而紫微朗豹尾潛而鶴禁清天時
極其良矣太行西來而列堵滄海東匯以環瀛黃河百
折承其前雷天壽萬仞障其後屏白虎蹲序而躩跂青
龍繞棟以拳擎地勢極其雄矣庶民子來百工趨爭輸
材颺倏協力霆轟巨石騰巖而迅舉神木走陸以遐征
曾歲月之幾何允不日而落成人謀極其臧矣憲背俶

以結構摹太階而縱橫雙闕凌雲恍蓬萊射日之銀榜
八柱擎天儼芙蓉接露之金莖規制極其弘矣左達文
華右通武英東壁則揭璇題於文昭西奎則標璘扁於
武成弘政顯其側振宣治名其旁閎顧瞻皇極萃業業
以獨聳鞠巍巍其高瞳堊丹青而灼爍甃文石以光瑩
覆壓黃泥括摩葱菁中極團圞而上規圓蓋建極深奧
而內接乾清體統極其尊矣於是吾皇乘景運握昌符
膺寶歷撫瑤圖展皇猷而儼然臨御斯殿也琬璫旁注

冕旒前垂法乾坤以懸象章日月以陳儀被龍袞之綵
繪障雉翟之姜蕤凜顙若於黼宸時沈潛乎衆思運紫
樞而不宰拱玄默而無為象天極也行中采齊節應琳
瑯秉介珪以步武鳴佩玉而鏗鐸廓厚德以載物持鎮
靜以居方法地極也正身示範端軌率物肅閭闡以風
化基重邦畿而樹表式首肇修乎人紀覃敷叙乎天秩
立人極也無思無為惟默惟玄運動靜以闔闢幹樞紐
而轉旋凝精於沖漠之庭遊神於象帝之先涵太極也

靈臺炯炯丹府融融闢四門而洞達開八牕以玲瓏聳
空中之樓閣恍象外之玄宮凝心極也審工師之求木
採大匠之斲輪遴棟梁以負鼎任柱石而秉鈞獨總攬
乎洪綱爰出納乎絲綸隆棟極也承上天之陰騭恢皇
謨而作極敬用五事又用三德宣八政以勤民察庶徵
而省惕致審於雨暘寒燠尤重於師祀貨食所以法洪
範而敷皇極也至若玉漏聲達庭燎輝煌皎月光而入
戶聽雞鳴而未央聆車馬之璘璘勤宵旰而遑遑時未

朝而居中極也羣工方退萬機暫逸覽封章以延納進
嘉猷而採擇佇委蛇之餘閒受啓沃之茂益時退朝而
居建極也仰瞻朱扉俯視彤楹省三樞之昭戒顧虛器
而持盈苟一木之內蠱將大厦而頽傾凜若累卵兢若
履冰覩丹銘而思保極也時臨青陽日拱紫宸因天時
以出治順月令而敷仁惠澤流於鰥寡懷保普於齊民
用斂時而錫極也遵道遵路是訓是式蕩蕩而無偏無
黨平平而無反無側民無淫朋人無比德庶民化而協

極也五侯九伯六服羣辟罔不會同咸來述職履玉墀
以趨蹌仰耿光而覲覲歡呼嵩嶽奠獻玉帛萬邦朝而
會極也南漸丹崖北垓紫漠東濱扶桑西底大磧雕題
窮髮之邦貫冒穿耳之國航海梯山纍象重譯稽首闕
下各執方物四夷來王而歸極也鳳凰巢於阿閣麒麟
遊於苑囿蓂莢產於階除萐莆生於庭堦卿雲爛漫以
繞殿甘露霏微而綴雷珍禾嘉穀列室而停貯野蠶八
繭當軒而疊奏和氣協於上下而治道底於極也嗟乎

古昔臨御之君物極則反勢極則傾滿極則洩畜極則
盈泰極者否形治極者亂萌歡樂極者悲來侈靡極者
盈生惟我皇之純德歷終始不渝而蕩乎難名丕繼二
祖之光祚克享累世之盈成其諸追天皇地皇泰皇而
相與游衍參乾極坤極人極而獨持權衡者歟薛曰惟
皇建極作京營室效彼蒼兮截薛峽岨嵒嶺崑崙崑崙以
昌兮霽霽寂寂霍霍歆鬱而揚兮龍翔雙蜺鵬掀鯤
喻翼其張兮宸居沕密穆清恭默儼垂裳兮軒祁風力

夔龍高稷明且良兮都兪吁咈贊襄啓弼謨則臧兮鼎
固盤石浩劫罔斃祚乃光兮惟辟玉食斂福錫極壽彌
康兮會其有極歸其有極永無疆兮

雖肅殿賦

明
顧紹芳


於維我皇紹丕丕基至德房皇醲化陸離八方帖以安
瀾九重謚其清夷然且廣廈細旃母替合宮之訪趨庭
問寢彌虔長樂之儀迨乎萬幾之暇登降逶迤俯仰祕
殿燕息自資既泮渙以少休乃穆然而深思曰昔姬文

之至德惟難肅以自持越在宮與在廟肆臨保之靡時
余沖人之不淑願援古以為師於是肇錫新名煜煜墀
階朱榜爰以高驤金書炳而雙排肅肅離離厥義孔佳
采微言於周雅諒故人之我諧寂乎其端居湛乎其心
齋顧諟常存比書紳而逾切師保如在與銘牖乎奚乖
爾其祕殿之為制也挺丹禁以宅址模紫宮而作鏡重
軒虹竊以相屬層閣鳳舉而如競崇臺珍宇接構連甍
寶砌瓊牕霞流綺映遠而望之光凌太乙之垣迫而就

之目眩蓬山之境是其儉不上陋奢不下病既秩且閒
亦深而靚豈比夫鄴侯之所經營奚斯之所嗟詠哉於
是我皇臨軒還軫鸞聲殷殷周覽厥象竄嵬干雲玉輅
戾止天顏有欣於以休憩乎是中屏息乎塵紛或籌幾
務或探典墳或棲神於澹泊或覃精於藝文漢主受釐
陋宣室之不度唐臣雜宴嗤集賢以奚聞益時當豐豫
而曰無已太康治屬綦隆而曰作所惟敬運太寶而無
為守中心以至正大廷廣會之時不以昭昭伸節宦官

宮妾之交不以冥冥情行從容九五朝靡衡石之勤惕
厲夙宵人誦垂衣之聖此所以即宸居而渙大命者也
夫肅肅以敬雖雖以和蓄之而上德曼羨溢之而醇化
滂沱以是天覆羣黎偏矢黃童之頌星羅萬國咸縻紫
塞之戈躋彼六合皆為化日靖茲渤澥永不驚波但識
太平之有象疇知帝力以云何昔在姬文道隆化浹是
惟肅雖光有大業瞻寶殿之巍巍揭璇題之業業窺睿
思之所存恍文德之克協彼古今遙遙其千載迺心源

一旦而相接於都哉古則文王之文今惟天子之德寧
敬而過母和而極洵既詰而既明乃欽欽而翼翼比德
既與文而為兩卜歷斯過周而成億是其軌前代而高
翔俟來禩而作則者歟



御定歷代賦彙卷七十三